



愛日

吟藁

堂



子與谷林定亥上二十年江湖之郵寄京洛之追尋家園
之止宿分題刻燭良亦多矣妄不自揣以爲當在等齊之
閒及其下世始盡取其集讀之其氣穆然以清其神油然
以瑩其取材浩乎莫窮其町其別裁蓋非一師一家之可
名也乃喟然自愧以爲曩者特管中之窺不料其所造一
至於此昔人之論詩者梅聖俞主于勤呂居仁主于悟楊
廷秀主于變夫不勤何以能悟不悟何以能變其歸一也
宋景濂輔益之所謂江山師友之助其實卽三家之言可
包舉也而予更有進于此者詩固三百篇之遺也苟其無
豫于人倫之旨則雖百計求工要不過爲世俗之詩谷林
之爲人也事親以孝待兄弟以友恭御下以慈接友朋姻

戚以厚可謂有得于溫柔敦厚之教者矣時與命乖徵車之役不得待詔承明未央之廷臨川詹事將處以三禮書局一席谷林睠懷寢門拂衣竟返放翁有云外物不移方是學者斯其人與晚年爲客所負家事漸絀顧怡然不以挂胸日益聚書矻矻可謂和平之極致矣所居小山池館之勝甲于錢唐竟日游息其閒巖壑之流止花草之苑枯澄觀嘿驗不必遠窮屐齒而化機已畢具于胸中然則谷林之詩之日進而上蓋有由然而區區蒼萃之富澄汰之嚴淵原之邃與夫諸老先生之所夸爲祕傳者猶其末焉者也而予也何足以望之乃爲之序其端乾隆十二年歲次丁卯中秋雙韭山民全祖望序

小山堂藏書記

全祖望

近日浙中聚書之富必以仁和趙徵君谷林爲最予嘗稱之以爲尊先人希弁當宋之季接踵昭德流風其未替耶而吳君繡谷曰希弁遠矣谷林太孺人朱氏山陰襄敏尚書之女曾孫而祁氏甥也當其爲女子時嘗追隨中表姑湘君輩讀澹生堂書旣歸於趙時時舉梅里書籤之盛以助諸子故谷林兄弟藏書確有淵原而世莫知也予乃笑曰然則宅相之澤亦可歷數世耶何惑乎儒林之必溯其譜系耶繡谷曰然嗚呼澹生堂之書其菁華歸於南雷其奇零歸於石門南雷一水一火其幸存者歸於鶴浦鄭氏而石門則摧毀殆盡矣一百五十年之中聚散存亡變遷

倏忽如脈望之難以踪跡予過梅里未嘗不歎風流之歇
絕也谷林以三十年之力爬梳書庫突起而與齊不可謂
之非健者而祁氏夷度先生父子有知雖不得之於其子
孫亦未嘗不深幸族黨之代興也已谷林之聚書其鑒別
既精而有弟辰垣好事一如其兄有子誠夫好事甚於其
父每聞一異書輒神飛色動不致之不止其所蓄書連茵
接屋凡書賈自吳中以至茗上挾書登小山堂者相戒無
得畱書過夕恐如齊文襄之待祖珽也每有所得則致之
太孺人更番迭前以爲嬉笑嗚呼白華之養充以書帶之
腴是天倫之樂所希也予之初入京師也家藏宋槧四明
開慶寶慶二志蓋世間所絕無而爲人所竊質於有力者

之手杭君堇滂問之以告谷林亟用兼金四十錠贖歸仍
鈔副墨以貽予及予歸谷林但取歷年所收地志示予其
自明成化以前者已及千種而予家宋槧哀然首列予不
禁爲之憮然谷林以予之登堂最多堂中之書亦多予所
津逮也請爲之記乃爲題志於堂之北墉

小山堂唱酬詩題詞

方葵如

文翰

走錢唐之艮則趙氏別墅在焉土山虎怒怪石鳥厲齧其
下爲魚梁窅然空然廝河渠以澹蕩之山則斗絕望之若
中川孤嶼矣錯卉障錦岸鋪島織蒙蒙離離冬春若一而
亭臺巉嶮往往覆露於山石曲折閒旁列黃雪森然雲挺
可隱百人可香十里蓋百許年物也遂顏其堂曰小山趙
氏有才子公千辰垣賦詩能工而詩人若張君東亭沈君
樂城陳君蔚九符君幼魯施君靜巖張君繼青輩皆麋至
至則修平原十日故事有會斯作難腥腐而餐楓香歸麗
則而翦蕙稗筆語之妙庾蘭成所謂可使小山承蓋者也
昔陽翟田承君兄弟有屋數十閒在縣南竹林店文史足

用又以崔德符陳叔易張宗文爲之戚友酒熟花開則流連浹日商榷文字意足然後歸余尚友其人輒企腳作天際想乃今於小山堂遇之又念諸田往者月話方狎豈容喑無詩歌而前喁後于索焉不獲諸君子金絲引和似爲昔之人補此罅漏幸勿使其無傳焉不唯小山堂之爲而出一鬻于鼎甘帶者鼠者染指嘗之得知正味或自慚其腥膻而不可饗也

前徵士谷朴趙君誄

全祖望

世宗憲皇帝修徵車故事詔開大科以充三館之選時臨川李公方退閒謂予曰大江南北人才大率君所熟知試爲我數之予因援筆奏記四十餘人各列所長甲精于經乙通于史丙工古文或詩或駢偶之學臨川喟然歎曰使廟堂復前代通榜之例君亦奚慙退之哉一日過予齋頭見有別集一卷曰誰所爲也予曰卽前所稱仁和趙君者也臨川把玩良久袖之以歸不閱月而

今上特起公爲戶部三庫侍郎其于予所稱四十餘人中多所展轉道地而谷林則自薦之未幾谷林之弟意林又被選一時以爲盤洲厚齋之家風也臨川左降谷林

召試于廷報罷而予亦去官臨川猶欲挽谷林共修三禮
谷林念其太孺人年高謝歸然竊謂以谷林之才必尚有
所以發其伏櫪之氣者而不謂連蹇十年竟以病死谷林
太孺人朱氏山陰襄敏公燮元曾孫女也其所自出爲祁
氏忠敏公彪佳外孫女也壬寅癸卯之間忠敏子班孫以
故國事謫瀋陽少婦家居朱氏以太孺人侍之因撫爲己
女谷林之尊人東白先生親迎實在梅里猶及見曠園東
書堂之籤軸及舉谷林兄弟時時以外家之風流勉之不
二十年谷林露鈔雪購小山插架之盛遂與代興爲吾浙
河東西文獻大宗同學之士雨聚笠宵續燈讀書其家自
予游丁荼苦饑火交驅學殖日以蕪落近更重以健忘之

病嘗語諸朋好願自改汝南之目退列于九等之下中而
谷林獨憐予不少替陳同甫曰呂伯恭旣死誰爲知我予
初哭谷林詩謂其內行之醇備問學之淵懿而深悲其遭
遇之厄窮是固不僅以交情也然卽以吾二人之交情又
豈世俗之所可同年而語者哉山陰金小郟詩人也窮老
無子慈水老友鄭義門謂曰生于我乎養死于我乎殯小
郟已安之矣俄而辭之遠行谷林遇之錢唐江上問將何
之曰之楚曰八十老人盛暑爲二千里之行非情也固畱
之止其家半年而病醫之藥之死則殮之呼其從子而歸
其櫬以葬之義門聞小郟之卒也爲之慟及聞谷林之竟
其後事也爲之流涕蓋谷林之善行不可悉述而卽此一

節足以槩見其餘矣君諱昱二十字功千谷林五十字也
先世固宋宗子居紹興之上虞遷杭已五世曾大父諱某
大父諱某皆以從兄尚書貴累贈至光祿大夫吏部戶部
侍郎父諱某官象山教諭所謂東白先生者也配陳氏子
三一清志清式清志清早殤女五長適許柱次適陸基次
適姚立德次適汪日森次適范相彬立德以祖少宰蔭任
江寧通判餘皆方雅之族孫七孫女五享年五十有九所
著有愛日堂集十五卷谷林在日嘗語諸子不欲求諛墓
之文故一清請爲變體且謂予習知江東舊聞識其家門
闕闕予援柳州誅虞氏之例以志之年來臨川老病未知
能如水心之于滕歲爲文以傳之否也乃爲誄曰

嗟乎谷林軼羣之學華國之才天實爲之其命不諧有子
不死有文不朽在爾曠然浮雲何有而我思舊聞笛蒼涼
南華堂下不滅山陽三十六鷗自來自去臯復不歸故人
延佇

愛日堂吟藁卷一

仁和趙昱谷林

小山乙藁之一

臯亭道中

西溪看梅

并序

初夏三首示意林

布置小邱成

香眉菴曉起

重午

題松門畫

池上

東陽王虎文淳安方樸山山陰周粹存同里沈欒城
吳繡谷厲樊榭符葯林家弟意林謙集小山堂分賦
得黏字

題張默稼南菊集

雨後晚荷

次韻默稼集小山堂 擬古二首

慧日峯訪亦諳上人不值畱題二首

次韻默稼雨後三首

張默稼歸桐城畱別次韻二首

題亦諳黃山圖

翁副使蘿軒陳觀察就莊過訪就莊有詩見贈次韻

酬謝 水車

送別意林北上

題朱鹿田水部扁舟詩意圖

凌霄花

歲除雜咏集二林吟屋分賦

交年疏
鍾馗

雪夜聯句

題陳授衣閉門覓句圖

甲辰上元前二日讌集南華堂用少陵雨過蘇端韻

簡鄭進士瀛洲 夜集南華堂

塘上曲 小院

南華堂聽雨

題堇浦松吹書堂次鄭筠谷檢討韻

深柳草堂圖為友人題

鶴子 哭亡兒志清八首

次韻葯林京師寄懷

晚春西池夜坐欒城鹿緣同作

妝域聯句 并序

懷葯林

送樊榭之京師

偶述東江聲樊榭時偕客京師

懷葯林園花

觀書圖

謝人惠建蘭

遣暑

新蟬

殘蟬

雨後

曉過西池

題聽琴圖

送萬九沙先生之江右

題九沙先生家藏蘭牕卷

題梅花卷用趙閒閒賦梅韻

開湖次樊榭韻

儂山樓閣圖用東坡烟江疊嶂圖韻 并序

慰意林悼亡時余先有喪子之痛

西溪看梅 并序

辛丑二月十七日有人從法華山來問梅花信

云已吐萼遂招欒城葯林諸君放艇西溪裁數

折見臨水十數古梅過此則一片迷離不復知

有人閒世矣是夕宿石城塢畱山中信宿凡烟

中月際梅之清妙奇致靡不畢收因各記以詩

出郭溯滌洄野艇放河渚孤香四紛披薄雪敷虛墅迢迢

曲徑深幽情一延佇

疎花生幽光月淡香氣合置身橫斜閒松竹亦蕭颯清夜
愜素懷露下衝寒踏

愛此梅花路尤佳是石城雲翳深塢白竹逗細風清落日
古苔靜暗香流水聲去來隨意賞修到幸余生

右石城塢

竹裏僧居三十二冥搜幾徧付歸吟溪橋較更來時好添

上殘陽落晚岑

右花塢

清香吹入五更夢山鳥一聲聲喚遲自起披衣花下坐逃

離還認月來時

右曉起坐梅花下

同作

沈嘉轍

搖曳輕風舴艋開竹邊籬外影徘徊放篙一路彎環去
篷底春流篷上梅

臯亭道中

一望峯巒紫翠明水程初歇入山程桃花向客工嘖笑芳
草逢人管送迎畫扇香邊邀戲蝶酒帘影裏語雛鶯烟光
百五臨寒食處處春風喚賣餠

布置小邱成

庭蕪不耐一春深掃石安山共客臨自乏多金求笠澤聊
依枯法畫雲林花開枳殼東風薄蕊滿青梅晝雨沈尚覺
角頭宜小樹再馳書帖索來禽

初夏三首示意林

賸紫疎紅一夕收曉寒簾外麥風秋殘鶯猶未辭金谷乳
燕依然傷畫樓羅袂采桑嫌雨潤山廚鑽棗喜烟浮園林

到處鳴禽喚試問西堂得句不
山舍初晴鳥鵲譁園梅未熟氣清嘉
息機嬾看松閒局卻睡先烹竹裏茶
自笑蠹魚偏食字更憐蝶夢不離花
幽情欲訴憑誰得窗外微風燕子斜
蕭閒少事覺身輕掬水看雲遣世情
不學逃禪通半偈已能齊物薄微名
松筠節老堪爲友鷗鷺心閒好結盟
喚取奚奴先滌硯刺薇花下待詩成

重午

海榴紅破薦辛盤五日清風試綺紈
蒲盞泛香和杜芷葵箋搖翠滴琅玕
黍炊菰葉聊從古雨洗桐花小覺寒
勝事每占三楚記可憐無意沐芳蘭

香眉菴曉起

曉窻初雨霽涼意似新秋蛙鼓林塘
遠蟲吟草閣幽明霞開繡障落月澹
銀鉤更不須巾襪披衣聽水流

池上

細雨點平池文暈殊可愛亂出魚苗
驗紛落唾花碎豈必風漪生乃以見
水態

題松門畫

水色連秋陰溼溼生遠妙霜微葭莢
黃沙晚鷓鴣叫不見拏舟人空亭淡
殘照

東陽王虎文淳安方樸山山陰周粹
存同里沈欒城吳繡谷厲樊榭符葯
林家弟意林讌集小山堂

分賦得黏字

盡日憑誰消寂淹招要名彥語清恬裁箋分坐空階蘚看
樹高懸一桁簾風落池心魚子散香飛衫袖酒花黏殷勤
此夕成歡會更許流連報夜籤

題張默稼南菊集

喜挹君標格清詞一卷將孤絃成絕調秋思抱寒香世路
幾通塞才名見老蒼酒燈重展後新雨夜添涼

雨後晚荷

雨餘池上罨蟬紗晚閣虛閒清氣加敲殘跳珠畱碧影半
闌露尾著風花葑開水步魚苗上歌入蘆碕艇子斜一片
夕陰涼不斷藕香深處便爲家

次韻默稼集小山堂

客子新從鹿几來屏閒樂府記清才鷺雲鷗雨同歡賞涼
月秋燈暢好懷世味薄嘗輸蟻夢名心初冷似鑪灰論交
賸有寒梅在與約春風試後開

擬古二首

抗志悅巖關舉世斥雌伏山水結相知冥契如昔夙蕭然
人境清烟秀橫畫幅日夕寓微尚於此想幽獨掩扇洛下
吟寧遂等奚落

幽光不可掩白雲遠嶺生時至勿自棄軌轍遵先民羔雁
正厥始實效非虛聲如物際春雨一一欣敷榮進退苟無
歉庶不乖初情

慧日峯訪亦諳上人不值畱題二首

夕亭轉蕭澹竹外罨微明漸見玉盤上遠自孤桐生水色
侵露氣結此人境清永坐有餘思輝輝弄前楹
空外生清機偶契入禪境微風過藕香廓然織慮淨夜涼
蟬一聲林響落餘聽但惜賞音希寥寥誰與證

次韻默稼雨後三首

蘊藉周公瑾風流石季倫吟中餐秀色眉上識清人薄酒
杯行淺殘霞雨氣新晚歸禪子室相與結秋鄰
雲山與烟水茲夕挽登樓涼井虛聲集風荷一夜秋離絃
聽斷曲客夢管清愁起視空亭月寒光似水流
更有湖山約西風載鶴歸庭延秋樹影涼到藕苗衣畫本

攜行篋

時攜示李龍
眠列仙圖

茶烟出短扉蕭寥江路客於此發清

機

張默稼歸桐城畱別次韻二首

林風蕭瑟送西商一曲驪歌爲繞梁鷗夢水雲分遠碧雁
呼江月度微茫卷中南菊香生晚鬢上秋絲色染蒼多謝
羈孤勞贈畚魚箋一一好收將
得挽行旌小駐無鄉思牽率客心徂酒邊吟句成淒韻江
外烟嵐列畫圖鷺影藕花單舸竝雨聲竹院一鐙孤莫愁
湖是君歸路憶著相思愁滿湖

題亦諳黃山圖

山水寓清微幽人任所採黠峯更奇闢諸境殊未逮藥苗

散烟香松聲響空靄晨夕展斯圖遙情寄雲澗

翁副使蘿軒陳觀察就莊過訪就莊有詩見贈次

韻酬謝

二老風流甚朝聯車騎過寒消春水漲晴放柳絲多醇飲
成歡洽孤吟待刮摩端須畱大道相許挹文河

坐久詞源倒能令清抱開林花烟影合山色夕陽頽款語
還修酌嘉賓爲翦萊淹畱無計獲從者莫相催

水車

農夫頌祝祈豐年五風十雨期無愆去歲旱魃虐已甚恰
愁今歲仍相連月交芒種插秧始溝中細水餘涓涓翻車
之用不可緩斷塍敲岸施蟬聯腰趾互憊耄稚併傭力日

費青銅錢自辰迄酉聲歷落前山下還喧闐量視碧痕
頓減尺漸看涸轍心憂煎雷轟電轉壞且脫望歲何時呼
蒼天人力竭矣天不雨忍此禾槁零荒烟

送別意林北上

癸卯十
二月

離緒紛然至琴心易得愁適先君一
禫祭後一帆張別岸四面集行
舟雁影憐分去慈幃念獨遊明年春信早歸計莫淹畱

題朱鹿田水部扁舟詩意圖

野水如雲澹澹秋蘆塘一葉繫扁舟有聲畫裏江光好青
磴紅亭次第收

凌霄花

花裊青松百尺空雨餘刺眼夕陽紅柔條莫謂憑高易費

得延緣幾許功

歲除雜咏集二林吟屋分賦

交年疏

茲辰新舊易索饗答青冥餞歲愁無術賤天果有靈綠章
憑羽客黃紙付奴星更伴焚山术餘香正滿庭

鍾馗

威神窺挂幅又是一年更小妹喬妝媼中山慣寫生磔鬚
風弄影挾指鬼輸睛會得寒林境蕭蕭意轉清

董源有寒林鍾馗圖

同作

消夜果

沈嘉轍

巧手花奩送團圞破夜寒提攜兒女笑裝釘意思看打

馬歡聲寂藏鉤燭影殘辭年應有句閒喫對書攤

宋人薛泳

守歲詞一盤消夜江南果喫果看書只清坐

臙鼓

消寒圖過半鉦鼓紀年華翠袖方輕點嬌兒忽亂搗邀
朋喧委巷祀蜡鬧鄰家簾幙深垂處紅腔映燭花

膠牙餈

厲鶚

節物關人意殘年一櫟添蓼花分點綴粉蠶共繭黏俗
嗜難頤解微甘使口箝不妨吾舌在蜜味得相兼

粃盆

屈指開鑪後生盆卽漸催紅飛松葉火白壓豆稽灰列
屋明通夕深廳聒一回兒童應未覺扶暖上簷梅

蘆浦筆記

粃盆一
名生盆

臘八粥

杭世駿

窮月嚴凝候初臨
戊第三一餐傳淨甕
五味出精藍
旦過喧齋鼓冬餘供佛龕
遙知諸宅貴口數坐分甘

爆仗

驅魍遺故事篝火啓柴扉
聲肖山竹裂紙如林葉飛滿
城聽靜夜應谷送寒威
中有幽詩意豐年響不稀

雪夜聯句

息影不出門
荻簾掩老屋垂垂雲色膠
沈嘉 沈沈雪意蓄

陰氣掃未開
杭世駿 陽燄搜已伏連岡衰草披
厲 夾渚敗蘆

簇天低壓四郊
馮一經 風饕號萬木荒涼人境閒
昱 蒼莽物

情肅溪烟凝不流
嘉 野燒燐相屬遠樵急斧斤
世駿 寒舍忙

碌礪黯慘如睡山
鶚 偃亞欲笑竹枯椿蹲餓鴟
一經 深欄蝮

歸犢刺骨凜折絲
昱 擁鼻兢起粟瑟縮屢鷺拳
嘉 彎環或

鰕曲青帘騰醅香
世駿 素屏新紙複鑪疊石炭紅
鶚 窻裂水

蕉綠三高遲釣緡
一經 七賢擬繪幅行想秋蟹爬
昱 竚聽春

蟲撲暖釀霧幾朝
嘉 響待霰一帚天機窺翁張
世駿 易理推

剝復建丑月既窮
鶚 逢戊信可卜遷延人日花
一經 畱宿豐

年玉小試白戰催
昱 嚴宵共篝燭
嘉

題陳授衣閉門覓句圖

空山閉影冥冥思清蒼
句琢珊瑚枝問君應復何所嗜
日昔雜誦黃九詞

甲辰上元前二日讌集南華堂用少陵雨過蘇端
韻簡鄭進士瀛洲

春陰散池角晨起招夙好試燈風景佳巾車煩過早扣扉
同啄木荒徑慙未掃逢迎語笑溫雙屣躡應倒清話鬪茶
角吹菰復煮棗小雨梅簷過林寒香意抱疊韻拓長箋佳
辰風草草登壇孰雄長推轂有鄭老角逐來數子森森壁
壘保余也媿曹滕退舍奚復道

夜集南華堂

空堂命酒夜鐙紅未飲醇時思不窮花外客來雙屐雨更
闌人語一簾風神閒射覆談偏中韻險分題句竝工莫惜
春城歸路滑等閒吟醉幾回同

塘上曲

垂楊生路傷其葉何萋微常知迎春風不知牽客衣

小院

小院綠陰淨風櫺四面開誰家新燕子飛過女牆來

南華堂聽雨

蕭蕭初入畫檐吹漸到淒其幕屋時香爇昏烟浮遠翠花
陰宿鳥立荒陂珠翻曲沼新添漲蠶上春簾晚颺絲無那
絮雲山影合不成眠處響垂垂

題堇浦松吹書堂次鄭筠谷檢討韻

小築新居亦可人樂如東老不言貧倚屏石竹看成畫連
屋書牀坐拂巾隙地周遭纔十笏閒心料理罷殘春閉關

大有清佳意謾謾寒松耳洗塵

深柳草堂圖為友人題

花謝邗溝續續飄水風烟色自條條歸來只愛涼陰薄小
住紅裘雁齒橋
風前畫出碧千尋簾外籠遮深復深他日經過好城郭隔
江水調聽歌音

鶴子

晚引雙雛傍雪翎竹風吹雨過天青點杯新上輕黃色補
入浮邱相鶴經新生時淺黃如鶩兒
作伴山翁寂莫居為他分料買溪魚聽來猶未成清喚好
待秋風健翮初

哭亡兒志清八首

雍正甲辰二月二日夭歿時年十三

鍾情似我易關情春雨冥濛春草生晚入畫梁雙燕子羨
他辛苦養雛成

研網蛛絲卷掩塵小窻三月任橫陳揮餘老淚冥冥思彈
指空齋過一春

六六鱗封寄遠天旅懷南望亦生憐冥冥屬汝窮泉下細

雨黃昏受紙錢

時意林弟在京師聞耗以書寄慰并緘白鏹屬買紙錢冥施

挂遺畫影竟模糊卅角眉痕貌得無縱復寫生呼欲出空

餘一幅教經圖

亡兒歿不及寫其容貌追憶竟不可得意林在京師虛撫形似寄歸題曰教經圖

母愛從來苦溺情哀嗁絕似夜猿清孤鐙風雨腸如割眼

又昏花欲喪明

室人病目有年連夜慟哭幾至失明

決絕悽涼喚阿兄雁分殘影杳孤征傷心同氣遭摧折淚
掩春衣似雨傾

浮生夢幻竟何憑不了前因破壞僧白月曉風誰作伴殯

宮長倚一龕鐙

權厝葛嶺僧舍

空花過眼十三載今到歸休始信空情颺飛絲收不得林
花吹斷晚春紅

次韻葯林京師寄懷

殘年兄弟好同居棲息先人有做廬蟬抱空枝愁欲盡人
過烟市夕常虛飄零憶我吟情苦迢遞憐君歸計疎一椀
松肪風雪夜不妨時寄數行書

晚春西池夜坐樂城鹿緣同作

寒月侵池角延將小院春風懷三月莫惆悵一番新舊雨
交成水深杯味入醇心輪移坐次永夜話津津

妝域聯句

并序

妝域者形圓如璧徑四寸以象牙爲之面平鏤
以樹石人物丹碧粲然背微隆起作坐龍蟠屈
狀旁刻妝域二小字楷法精謹當背中央凸處
置鐵鍼僅及寸界以局手旋之使鍼卓立輪轉
如飛復以袖拂則久久不能停踰局者有罰相
傳爲前代宮人角勝之戲如武林舊事所載千
千日下舊聞之放空鐘之類蓋藉以消吹花永
晝闕題葉閒思所謂妝域者也甲辰閏四月十

二沈嘉轍樂城吳焯繡谷厲鶚樊榭杭世駿董
浦暨昱兄弟集小山堂賦之

深宮晝多閒樂事午相較

嘉轍

舊戲罷攤錢餘歡收握槊

鶚

高檠拭烏皮圓轉走羸殼

焯

花背龍紋蟠巧心象齒斲

昱

黃香別方陞藉粉界橫椎

世駿

一一翻衣痕千千拂巾角

鶚

午鍼豈能停丁腳不須捉

焯

左次星離躔中規月還朔

嘉轍

久行戒敲傾小住防犖确

昱

寶曆暈重重風車盤數數

信

北南眯易遷朱碧眩難覺

鶚

十刻費環循一錐空倒卓

世駿

烏三匝未棲蕉百回仍剝

信

蓬卷無根株渦洄亂清濁

嘉轍

徐時影續翻急處勢騰踔

焯

氣竭猶蟻旋局殘屢鶴啄

昱

文窻紛合圍紅袖競關撲

嘉轍

快奪金百鏹偏輸玉雙珎

信

閑

迴腸託防閒匪石謾謠詠

鶚

攏鬢婢爭看扶腰女初學

嘉轍

眉顰側輕鈿臂瘦動寬鐲

世駿

人語喧行廊花光颺繡桷

焯

前塵已微茫小物尙高邈

昱

細字認蠶眠兒戲等燕濯

信

蒐羅譜莫憑奧衍句從駁

鶚

徒用刻楮工相看齊一握

世駿

懷葯林

客路遲歸斷續風天涯離思復何窮知君覓句工烟水卻
泛菱花五月中

送樊榭之京師

黃塵多處苦炎官後日西風待雁翰惜別有辭空作惡淹
畱無術強言歡颿開遠岸谿流急蟬噪秋林客意酸此去
燕臺懷舊侶夜窻燈火惜形單

同作

沈嘉轍

只好詩書不好官霜風偏是迅修翰夢回昨夜猶聯榻

眼送孤篷又挂歡

南人謂帆曰歡

別酒不須千盞醉離辭無奈

一生酸寄言獻賦長安客晚日休嗟野騎單

偶述東江聲樊榭時偕客京師

雙蛾何必畫纖纖只問當前愛與嫌解引羊車來竹下夷

光豈遂勝無鹽

次韻

金志章

亂頭麤服影纖纖客谷幽居自不嫌
懶學新妝鬪時世任教刻畫笑無鹽

懷葯林園花

空檐吹雨過暑散一開顏憶客正臨水微吟住半山藕香

湖浩淼螢暗竹蕭閒明日遲歸棹應來早扣關

觀書圖

長日橫陳卷軸閒翻翻書葉一開顏
眼邊匹似烟雲過得意了無文字閒

謝人惠建蘭

漳水蘭初茁玉芽翦分雙蕊客同誇
捶琴正好絃秋意伴我露香孤月斜

遣暑

快雨能留數日涼草堂無暑即羲皇
臨池弄水憐新色倚檻抽荷發妙香
祛蠹欲求醫樹法銷閒偶錄種花方
此時

不異山中客松桂成陰鶴夢長

新蟬

倦日池塘外蟬初上樹鳴微風聲自澀雙翼鼓還輕纔益
晚涼思便餘秋影清纖形描未了黃雀早含情

殘蟬

蟬聲近殘咽清氣集虛關無復炎飈響祇餘涼夕閒孤音
翳柳影病思屬秋顏自此益蕭澹愁吟葉落山

雨後

竹屋涼催雨秋前一夜聽挾風飄過瓦入座點燈青文卷
親鬆几瓜壺摘野町從今炎暑退農父樂安寧

曉過西池

露荷瑟瑟曉風吹殘月依依野竹垂入夜清游嫌未足更
須和夢到西池

題聽琴圖

襟懷老去似坡仙猶復能參指上禪翠袖朱絲才一撥卻
嫌箏笛是繁絃

送萬九沙先生之江右

幾日涼生樹征帆發短亭吟情隨遠水鄉思倚秋屏晚榻
風前掃西山雨外青客鐙舟尾颭點點亂江星

題九沙先生家藏蘭窻卷

雪竇山人冰雪身湘臯烟葉自成鄰欲尋竹屋窻前語已
歷梅花劫後春二百載還逢舊物三千里外見遺民卷中

愛日堂詩集卷一
九畹餘芳在習習清風不染塵

題梅花卷用趙閒閒賦梅韻

孤花點空林披卷著墨奇寒月落烟際光景澹相宜裴回
有高士蕭然海鶴姿童子荷鋤立晚雲護霜枝憶昔西溪
游冥冥黃昏時手掬梅花泉篝鐙苦哦詩

開湖次樊榭韻

重湖清泚碧漣初藉有官程課瀹疏淥淨遠空新捲葑波
寬春養放生魚鷗盟鷺狎尋常客泛宅浮家浩蕩居再識
雲鬢西子面風前容與態何如

僊山樓閣圖用東坡煙江疊嶂圖韻

并序

余購得此幀絹素漫滅無作者名氏上惟存金

門畫士俞存熙二印文俞爲枯蒼龍泉人師永
嘉趙仕謙永樂中召爲金門畫士見兩浙名賢
錄因賦長句題其上同作者吳興韓怡園同里
沈樂城吳繡谷厲樊榭家弟意林

朝來讀畫几硯邊神愴舊蹟淪風烟長圖展處發奇秀過
眼令我心悠然蒼翠閱古山木合凌空傑閣橫飛泉石基
子聲落窻戶雙眸炯注輸平川溪雲澗水各迴抱竟非人
世無人前幽林更許客還往古老款接山中天金采錯敷
半明滅礬綠剝蝕韜鮮妍兩頭軸碾犀角重堪憐坼絹龜
文田僉云筆力覩罕有模糊缺印知何年重思完好付衰
潢頓還舊觀明娟娟錢唐最數戴文進得意落筆忘飢眠

愛日堂吟藁卷一
九重題試親甲乙秋江一幅似斥仙君畫九工遇九勝獲
觀妙品三生緣金門院體有如是起同好事哦長篇

慰意林悼亡時余先有喪子之痛

淒其相對兩無言不信奇香有返魂舊淚觸余搖眼尾新
愁憐汝結眉痕鐙殘夢井孤吟斷影獨扶牀嬌女存共侍
慈顏今白髮相持未敢慟朝昏

愛日堂吟藁卷一

愛日堂吟藁卷二

仁和趙 昱谷林

小山乙藁之二

西溪看梅畱宿石城塢精舍憶辛丑春梅花盛開與
欒城葯林到此流連昕夕今欒城畱長沙葯林客京
師僂指前游五易星霜矣惻愴中情與意林同賦乙
巳二月廿有八日

晚過永興寺庭中有馮祭酒手植梅花一株屈幹古
秀疎萼綴條二百年物也壁上讀樊榭葯林舊作和
之

殘春集瓶花齋次繡谷韻

和樊榭雨中移居之作

冷泉亭看水到時昏黑林雨如漏繡谷意林同賦

次韻意林茗飲
題絕壑松聲圖

箬笠
椶鞬

慧日峯訪亦諳上人不值

藕
梧子

春詞
新柳

芳樹
東亦諳上人

仲仲山蘆江垂釣圖
折枝楊柳便面

石田翁冷泉亭圖圖為田居侍御家藏余近得之上

有石田自題詩一首繡谷欒城樊榭授衣虛舟敬身

依韻同賦
題樊榭湖船錄四首

雨中種蘆
次韻葑林京師寄懷

送欒城之長沙二首
題古錢摹印冊子

哭吳興韓怡園
哭亦諳上人

柴胥山出塞圖
翦秋紗

夜聞鄰曲琵琶聲
陳老蓮閨人手拈紅豆圖

病足
倣唐人春怨二首

和樊榭吳山雪霽用凌柘軒韻

述懷
東風

雨窻東樊榭
答玉几貽研

題意林雪山行騎圖

再題意林雪山行騎圖二首

夜坐漉舫寄懷吳石蒼

小山殘桂

送玉几

和鹿緣

題意林為葯林作秋林讀書圖

和葯林意林雨中湖上看荷用懷清少宰立秋日贈

張漢占韻

秋雪

題意林畫四首

洞庭秋色
寫生荷花

朝妝緩步
蘆灘秋雨

題意林梅花書屋圖二首

題顧餘冬畫二首

食熊掌

梅花下寄江聲二首

題天台陳南陔詩卷

偷兒兩次入園中竟成空返意林作詩解嘲余亦次韻一首

西溪看梅畱宿石城塢精舍憶辛丑春梅花盛開與樂城葯林到此流連昕夕今樂城畱長沙葯林客京師僂指前游五易星霜矣惻愴中情與意林同賦乙巳二月廿有八日

置身香雪林濛濛白雲匝再至披清襟因緣重冥合石澗涓水鳴鳥語空山荅客心耿夜永枯禪縛吟榻聚散竟如雨窻前任蕭颯花寒水逾潔竹外紛影雜夢破悄無言烟中乘曉踏

晚過永興寺庭中有馮祭酒手植梅花一株屈榦
古秀疎萼綴條二百年物也壁上讀樊榭葯林舊
作和之

山色染頽陽昏烟覓蕭寺殿角風吹雨壞佛危廊置紆回
蒼蘚合疎枝俯簷刺綠浮春陰中花萼競標致空林時討
尋幽冷愜孤思昔賢抱微尚快雪風流寄寥寥冰雪情歎
息誰復嗣僧窻啜新茗石泉清可試向夕發高吟誰歎屬
倡始華辭耀虛壁二豪先奪幟

殘春集瓶花齋次繡谷韻

離情黯黯送將歸欲縮輕陰思力微吹到好風花信去感
餘舊事酒人稀聲淒樹底流鶯澀影戀香藜瘦蜨圍判斷

蕭寒爭幾許祇今寂歷掩空扉

和樊榭雨中移居之作

城陰連舍背蔬畦蕭散如君復可棲注史名亭供歲月樊時

榭約與堇浦分注金遼史卜鄰依水擇東西牀牀避漏明燈在葉葉披

風瘦竹低原倡有一竿竹小市橋聲門巷轉涼秋徑訪客

同攜

冷泉亭看水到時昏黑林雨如漏繡谷意林同賦
山風山雨下亭陰流水縱橫澗石深烟際晚昏摧雪浪樹
頭寒響發清吟棲遲僧舍畱餘味寥落雲巖寄此心詩興
未闌催客夢朝來消受竹涼侵

次韻意林茗飲

禪因茶味得參自趙州師玉色開香乳寒茸鬪古瓷薄涼
初解夢清嘯幾延思一榻秋陰暮回甘默自知

題絕壑松聲圖

曳杖閒行水石閒松花吹盡不知還一聲絕壑傳清響落
日寒潮壓亂山

箬笠

團團青箬影蠟屐若相須雅有泉石趣恍披烟雨圖鹿皮
同樸邀蟬翼等泥塗久與世情隔終宜屬野夫

椶鞋

緩步日清暇尋幽著頗宜輕便差比葛精巧不緣綦石磴
涼先得山泥溼未知野翁裘束好跂腳瘦藤支

慧日峯訪亦諳上人不值

一徑入烟翠尋師慧日峯山高結宇淨門小過雲封橫榻
餘清卷空堂欲晚鐘所思人去杳愁倚石邊松

藕

買得蓮根約臂長新泥初洗出筠筐瓏玲片玉堆盤冷飄
瞥涼絲觸手香瀟盡紅霜教膳祖裴成銀粒付廚孃最憐
花下生方好小艇延緣在水鄉

梧子

秋風落葉報庭梧乳細垂檐洵可娛嫩菽斜排蓮瓣小青
椒一掬井紋枯藥教婢子丸相似珠化桑根色與俱我愛
濃陰生滿屋倩人補作洗梧圖

春詞

試問春深淺，芊絲一望中。色勻蘭葉雨，香徧杏花風。每上荒臺榭，難尋舊寢宮。玉躑踈處穩，來往見青驄。

新柳

誰挽春波渲，柳絲瞳瞳曉。日上鶯兒底，須綠棹。迷千縷，先與紅亭嫁。一枝烟淡乍，勻新黛。色風柔，試舞瘦腰支欲尋。野店無勞問，黃鳥聲中有酒旗。

芳樹

高原有芳樹，陰森綠葉繁。雨餘映晴日，餘翠來亭軒。時復好風至，更聞山鳥喧。幽人把書卷，竟日坐忘言。

柬亦諳上人

清閒聊與野人宜，笛簟藤輪睡起遲。芳樹多陰藏細鳥，落花無力駐游絲。浮名塞馬終何益，真樂濠魚祇自知。遙憶山中泉石侶，綠釵初摘試煎時。

仲仲山蘆江垂釣圖

占斷空磯一老翁，夢牽沙柳釣絲風。一灣淺泊蘆根裏，江月寒歸秋雪篷。

折枝楊柳便面

露漉風吹不自任，江邊曉色麴塵侵。聚頭瞥見春情黯，便引離懷一番深。

石田翁冷泉亭圖圖爲田居侍御家藏余近得之
上有石田自題詩一首繡谷樂城樊榭授衣虛舟

敬身意林依韻同賦

飄蕭落墨染晴暉幻出靈機思入微流水縱橫秋影去亂
峯點刷白雲飛亭延野趣閒僧住夢破花香過鳥稀我與
烟霞已成癖團瓢結得便忘歸

同作

吳焯

谷林五兄出示石田冷泉亭圖圖爲田居先生故
物手題次韻詩於邊幅憶乙未歲余偕先生過虞
山訪耕烟老人挈斯畫屬其臨摹耕烟謝不能爲
作焦墨楮本旣而索潤筆時余戲有詩云聽似松
濤卻是泉一經過去夢魂牽虞山粉本分明在付
與王翬賣酒錢偶見斯畫并舊事書之詩仍次韻

晨坐高齋竟落暉祇因讀書悟幽微聽來畢靜水生響
看到出神峯欲飛往事重題增感慨舊游如夢記依稀
回思裙屐經行處空惱耕烟閣筆歸

題樊榭湖船錄四首

冷吟閒醉在湖邊卷裏光陰舊事傳故老風情消得否一
聲清唱住紅船

誰與鶯花作護持帛蘭曾汎又多時樽前一一看如畫供
我青山無限思

不繫風潭勝陸居早延寒薄水窻虛先生手著傳清綺可
竝行朝禁扁書

重拾何羅名樣題吟情兀兀賈亭西放船不見上船處嶺

月舊荒烟寺低

雨中種蘆

短短青蘆淺碧扶披披交葉小亭孤聲聽似破扁舟夢暮
雨秋風南障湖

次韻葑林京師寄懷

相思片片似孤烟零斷清吟寄遠天一笑春風成往事可
憐秋病共今年繙鈔蠹策從人借結縛松亭只我眠自問
諸餘復何有閉門無事亦悠然

送欒城之長沙二首

雁影江關烟水重離卮深覆失歡悰相尋漢上題襟客七
十二峯詩思濃

客路殘陽賦得否冷雲零亂半江秋憐君江色看成畫黃
葉黃花易得愁

題古錢摹印冊子

漢世厭勝錢十三形可數體圓異干盾利用殊九府金玉
粲文字永佩錫多祐主人媿蒼雅椎拓十得五墨黝入痕
織銅綠生暈古夙昔在唐時降賜荆山主太平百歲蹟宛
然出荒土搜攷諸祕怪毋乃是其伍挾冊亟延賞精覈補
洪譜形模紀年殊黃紫標各豎洗眼三摩挲夜闌鐙炮雨

哭吳興韓怡園

一瞬空花過音塵隔九原詩名憐世學舊事憶能言時方謀刻
其尊人所選今詩兼初白老人贈詩有韓老能言之句欲踐湖山約難招弁水魂西

風重延首猶爲哭陳根

哭亦諳上人

講堂畱半偈解脫正秋風人去蓮花社經殘貝葉宮黃山
游跡遠慧日鳥言空無復逢長爪誰憐梵志翁

上人昔游
黃山程松

門爲之
畫圖

柴胥山出塞圖

游子塞垣去蕭蕭班馬愁馳驅依幕府感慨賦登樓雪暗
巖關路沙鳴萬里秋鞭絲與帽影來往任風流

翦秋紗

天孫將赴銀河約巧翦殘機戲烏鵲人閒得之生此花采
雲璀璨枝頭落豔色秋江濯後新千花彷彿翦刀痕欲憑

嬌女閒鍼線縫取霞綃作繡茵

夜聞鄰曲琵琶聲

夜飲西窻風瑟瑟清歌飛渡重門出停歌還復撥琵琶幽
恨纏絲指閒述慢撚輕攏曲短長此身不異向潯陽河橫
斗轉聽未盡人倚珠簾空斷腸

陳老蓮閨人手拈紅豆圖

生同南國種離離紅淚秋風弄幾枝閒煞湘湖老居士寫
來檀板記相思

病足

閒居藥裹費料量贏得蹒跚閉戶方負卻湖陰花事了一
春行腳近藤牀

愛日堂詩集卷二
九
做唐人春怨二首

花落空階綠漸肥倚闌雙筯染羅衣如何玳瑁梁閒燕只
向長干巷裏飛

淚盡嗁鶯不忍聽畫橋烟柳更青青誰憐日落紗窗晚倚
看春風十二屏

和樊榭吳山雪霽用凌柘軒韻

入夜吹花曉成白小樓客竝寒肩拍窗開了鳥快雪晴畫
幘老寬橫百尺選勝獨許東郭翁曳履試登孱顏峯江水
江天倚空碧海嶠日射東牆紅四望寒光杳無盡一繩雁
影斜飛近荒畦犖确少人蹤冰策蹇驢劣不進問泉青衣
畱空潭松毛煮石松風菴討尋舊事成俛仰指點歷歷憑

君談際此蕭寥風景莫起看屋角斜陽度一尊清醕多臘
營解寒漫邀盧六顧翳我棲託臥茅堂朝來飢鳥啾叢篁
屋瓦凝脂已三日排指動輒春蠶僵佳趣亦各領其妙琢
辭冷淡誇同調輸君烟靄歸途暝舉頭明月成吟笑

述懷

以下
丙午

悠悠元節改苒苒青陽度光風鮮枯株百卉泣朝露春叢
綠萼披芳樹朱英吐時至各自媚疇能安其故覽物多所
懷怒焉悲夙素弱齡讀書史往哲思追步孤悰一以違微
忱今曷播美人阻西方遙遙不可睹晉接亮無階懷哉時
已暮盛年不我畱員影日西墮何由附長風扶搖奮天路

東風

東風又到杏花時渺渺春愁可語誰草色碧連衣畔帶柳
條青憶鏡中眉疎烟細雨何人共小燠輕寒軫自知惆悵
畫樓連夜月無因相望寄相思

雨窻東樊榭

四月林館靜嘉木翳庭陰岸幘倚軒檻時時聞鳴禽風雨
東南來微溼沾衣襟遐思貯新泉試茗當自今抱甕承檐
雷石蘚空翠深微吟望天末雲氣尚沈沈塵氛藉茲遠竹
素庶可親偶懷阮公詠忽憶嵇生琴晤歌成夙昔淡日遲
徽音何時惠芳躅一爲邱中尊

荅玉几貽研

玉几貽我端溪石云是端州老巖出神功鬼斧琢不成天

然一片瓌奇質紅暈綠暈涵精光直如日射虹蜺蒼金刀
乍瑩鷓鴣血瓊卮初瀉葡萄漿松風亂灑蓬窻午玉蟾吐
水險麋舞雲氣濡毫筆不畱鬣磯龍尾安足數年來筆墨
真蕭條黃昏敲枕從清朝報君短章不稱意媿無平子英
瓊瑤

題意林雪山行騎圖

癸卯冬赴北
闡時作此圖

車聲歷落載輕裘絮帽衝寒數雁行向似清容京洛去圖
中風雪冷朝陽

再題意林雪山行騎圖二首

南浦傷心歲暮時忍看梅蕊綴橫枝逍遙堂裏愁人句風
雨蕭蕭又別期

雪凍風高騎不前天涯羈旅向誰憐每來池館清華處時

構堂成顏曰

沈歎行人落日邊

夜坐漉舫寄懷吳石倉

已當殘暑退夜色坐偏宜愛月每忘寢聽蟬如有思松風涼勸酒山溜響催詩北郭高人遠悠然語向誰

小山殘桂

桂雨生曉寒繁枝綠雲結隱几如空山殘花點秋雪

送玉几

以下丁未

舊雨連宵話情親夢亦同離尊桑落酒客路布帆風山晚峯峯紫林秋岸岸紅愁思望不極淒切待霜鴻

和鹿緣

層雲朝未散客意獨騷然梅子三時雨榴花五月天誰修角黍會難放錦帆船尚記吳歛發烟中唱采蓮

題意林為葯林作秋林讀書圖

吾子愛秋吟神清而嗜古中披一卷書琅琅出深戶外悴中自腴妙手傳其苦庭葉散空音千山聽成雨壁隙一鐙侵百蟲絮涼宇朝飢薦茗粥晚菘謀老圃樂莫樂于斯味外味堪取挾策意無窮招共晨夕數

和葯林意林雨中湖上看荷用懷清少宰立秋日

贈張漢占韻

荷氣侵闌雨報休水心涼曉住還不客呼烟艇正同興山挾樹聲都作秋未與佳游空兀兀獨成清思自悠悠露香

月底重申約消受溪風十日留

秋雪

夾岸蘆交礙碧流蘆中明月壓船頭試憑風力團成雪點點空花散作秋

題意林畫四首

洞庭秋色

山橫黛子水皺羅葉葉蒲帆秋色多指點西風斜照外今朝人去洞庭波

朝妝緩步

霧帳銀牀曉夢殘纖裙帖帖露華乾妝樓一霎閒梳裹日暮憐渠翠袖寒

寫生荷花

一花一葉無多筆綠意紅情兩得之爲語聯舟采香女不須爭赴最繁時

蘆灘秋雨

瑟瑟最宜寒确披披獨向空亭一葉聽殘一滴晚山洗出遙青

題意林梅花書屋圖二首

風衣振空林古月荒惻惻好夢忽吹來竹外起寒色
琢成冰雪句老屋聽琮琤入坐翻茗戰同參一味清

題顧餘冬畫二首

以下
戊申

草樹蒙茸倚屋堆亂山如墨拂雲開更思打漿前頭去涼

意一襟隨雨來
烟霞笠屐儂家具妝點終須不入時獨有賞心塵壒外任
他喚作虎頭癡

食熊掌

有客餉熊蹯入門方甌挈滇南勞遠至作脯脰雙截異物
少所見調飪肘爲掣宰夫膈失傳腊人製多缺或云宜芼
羹鮮腴可頻擷或云熟匪易漑鬻載燔烈嘗試訖未善饌
法嗤滅裂此須詢庖師敷解得其說湯燂竈觚淨硯膾玉
盤雪細膊旋焯掌久炙致搖舌柔喜挾箸肥封誇登俎飶
青鹽點韭花紫薑雜椒屑畱犁金七滑勻藥女醢蕪六畜
著禮經入珍饗清列食白者痺已試膽者塵溼鳳趾龍脇

誕駝蹠雞跖劣想其咆深林騰蹕震崖穴弱肉而強食爪
牙橫銛鐵豕突紛攫拏虎張肆蹶踣舐螫善匿藏置館劇
詭譎蚍蜉直目黝噓引拘樹跌狸狐貓貍醜對之失雄傑
傷哉受制人一朝饜饕餐吾儕志飲食竭來事舖啜黃頰
臞味甘虞棕矜獨絕

同作

沈嘉轍

枯坐惜春光啓篋繙故紙打門長鬚奴熊蹯青絡篚方
解過嶺袞急足趨花市知我昔有諾轉致情何已我本
澤國人水族等糠粃逐肉珍脂白不入南烹簋請君攷
食經嗜在雙蹯美引氣伏三冬盤跽掌自錫臠煮有饌
法火候慎治庀和獸尚梅醢五味均膳宰翠釜燂跗毛

井華日三洗硯響斫鐵躡爪甲拔瘦趾肯繁細剗劇雪
花落輕七羊簽擅廚孃葱絲說竈婢紅椒佐竹萌青桂
調玉醅雞臠肥所宜菌丁固中上聲使倉卒小會筵主賓
皆可喜圍座成大嚼饒又紛然起羹不數馳蹠漿則敵
鹿尾牛心炙已佳豚肩魚盆鄙鼻觀凝芳馨雋味溢殘
齒嗟我菜肚老一朝得染指散酒看初月庭花冑薄靄
攤飯且橫眠摩腹發深唉

梅花下寄江聲二首

最憐疇昔賦新詩清伴梅花合并時今日故人各天際彈
琴白石寫相思
梅林罷社愁萍散春鳥寒權噤雨唳卻憶軟紅鞞底倦難

分雙屐落花泥

追和

金志章

西風灑淚讀君詩繞樹微吟記往時回首舊遊真似夢
寒香空繫故人思
小山堂外梅花發月落參橫翠羽啼惆悵吟魂招不得
昏昏情思醉如泥

題天台陳南陔詩卷

陳為長沙攸縣令里誤未歸令子以詩惠觀係樂城尊人

澗房先生之友

盥手新詩誦秋鐙一卷橫江山供秀句羈跡滯歸程湘水
琴聲遠衡陽雁影清才名重耆舊低首謝宣城

偷兒兩次入園中竟成空返意林作詩解嘲余亦

愛日堂吟藁卷二
次韻一首

讀書南華堂露晨及烟夕周布水竹寬規以三畝宅弟兄
樂無事門巷憩幽絕偷兒入夜窺童僕語竊竊一呼張先
聲三走抵空隙狐疑翳深莽鼠竄觸怪石余只營一邱不
屑長物積案畱古帖香零亂委蓋篋刼請旣一出失利緣
再索推鐙假息偃實創卷波白碁急局中殘鶴警花外列
來貪攫几肉去嗟捉水月撫榻尚有甍探囊輕似葉樓疏
可勿施筦鑰復何益實求虛以歸計狡翻成拙

愛日堂吟藁卷二

愛日堂吟藁卷三

仁和趙昱 谷林

小山乙藁之三

包家山觀桃花

湖南送春同樂城葯林樊榭意林四首

四十生辰自述四首 中秋同樂城葯林意林作

過慧雲寺觀張約齋書陀羅尼經幢今支施生石和

敬身韻 同樂城重過慧雲寺

九日過白雲山房有感

十九日顧楨欄招集湖上時蘇堤新栽楊柳涼影可
翫因誦竹垞先生綠楊如薺酒船來句漫成一律

送欒城葑林之京師二首

與葑林分手河干暮雨初作黯然歸賦二首
欒城葑林別後雨雪驟作寒甚憶賦二首

次韻顧栢欄過蘿軒先生別墅感懷

栢欄招游湖上舟泊西冷橋分得冷字

秋寒

吳興吳楞巖過訪贈詩次韻

冬暖梅花盛開同樊榭汎舟湖上二首

晴冬園梅早放折寄樊榭

試燈夜初晴次樊榭韻 上元雪夜

堇浦乞方竹二首

王石谷水墨秋蘭用田居先生韻四首

寧峯精舍紅葉次壁上韻

不到岌光十年偕南垞鹿緣意林及兒子一清登絕
頂值曉雨溟濛寺僧出觀前人和香山畱題詩冊內
明高忠憲公一首辭意澄澹字畫古勁不勝悚瞻二
首

次韻鹿緣過訪北墅別業二首

己酉九月登高同南垞巨川用陶靖節己酉歲九月

九日韻

秋盡日意林南歸

醃菜次敬身韻

蠟梅四首和敬身作

瓶中蠟梅

立春前四日同南垞鹿緣意林汎湖探梅五首

送南垞歸石門二首 奉訂南垞看梅先以詩寄

懷 庚戌元日喜晴二首

晚立池上三首 上元雨中看梅

十七日喜晴坐梅花下 雨止喜梅花猶未開竟

早春同繡谷樊榭汎湖看梅期敬身不至四首

樂城旅館津門屢招不歸寄詩促之兼柬葯林

明鄭貴妃金書觀音普門品經八首

臺閣梅用東坡紅梅韻 賀南垞得孫

蕭山雨行 舟過陶家堰

山陰道上舍舟放步 樊江晚泊

清明日拜先嚴墓

先嚴夙好園林不肖構堂供奉遺像石門袁南垞搨

贈王百穀八分書風木奩額卽以顏之復得文衡山

風木圖幀上題詩一律爲其先人溫州守而賦哀音

感觸灑淚次韻與意林同作

包家山觀桃花

城南二月春風生招同游侶謀郊行小雨未成林日薄屐
攜兩兩登山輕包家山下桃關裏花發江村縣十里點點
燕支上竹梢樹樹珊瑚生海底更憑絕頂搖雙眸冉冉駐
足紅雲浮淺茵眠藉意無盡蒼荒舊寺風颼颼酒邀花色
烘人面後日飄零愁片片惜花孤思赴春情欲抵千金買

歌扇徑隨犖确轉山腰天開畫幘難渲描幾日沙頭見新
漲落花時節生寒潮野艇如鳧飛影亂層波緩緩烟江半
殘陽一角越山青暖枝扶起春陰散

同作

符曾

桃花天氣烟模糊好事邀往城南隅梵天寺前錦作障
包家山下花成圖嬉春不須攜行廚有酒聊爾沽雙壺
吾曹本是山澤癯對花小飲亦可娛耳邊況有鳥自呼
聽之宛似吹笙竽是中十里香作界一棹且可浴春蕪
人家屋檐花芬敷簾櫳窈窕窺名姝臙脂淡點白玉頰
雪膚半裹紅羅襦客來到此春與俱數點微雨衣不濡
風蕩日炙易蕉萃輕陰故爲籠花柎幕天無用張流蘇

席地豈必衣氍毹楚宮烟冷花生初息夫人醉須人扶
適從花裏望江際海潮東來坐靈胥一條素練橫江鋪
江妃水仙爲前驅春濤不比秋震蕩烟波容與飛鷗鳧
茲游興會良不孤絕勝買船游西湖我學曼卿彈果核
滿山徧種花千株明年與客重游乎還待春潮晚上無

湖南送春同欒城葯林樊榭意林四首

綢繆孤緒渺湖南際此年年百不堪心事銷沈惟冷坐空
餘柳影綠鬢鬢

行行牽挽賦將離廿四番風已斷吹起拍闌干愁欲絕生
憐燕子苦相思

憶誦清詩白太傅春風春水竟茫茫輸他蠶蜨畱情思猶

抱林花一縷香

不禁索寞赴冥沈
彈指將成破夏吟
愁向夕陽烟水外
好憑殘夢一相尋

四十生辰自述四首

小抱深居猛省時
年華如水去難支
漢陰丈者方勤灌
南郭先生豈濫吹
書至五鈔閒一適
酒纔三酌坐常辭
人間世事休悵觸
茆屋蔬餐分所宜

勞生強半易龍鍾

東坡云龍鍾三十九勞生已強半

漸遣諸餘任化工
長

日臥消門巷靜華顛
行染雪絲叢寬閒
水石棲心地飄瞥
鶯花過耳風硯格
冰壺橫素席蕭寥
吟境與誰同

一譚一詠有餘情
果藥羅庭意味清
尊酒夕陽林外暝
水

闌涼氣夢邊生
相從華萼言歡地
常侍堂萱奉杖行
課子橫經排日去
消除風月謝浮名

自問頭顱計已疎
閉關卻掃樂何如
隙中寂寂窺馳馬
眼底團團笑磨驢
幾兩屐攜幽壑勝
三閒屋構浩歌初
碧湖更占西南好
耕釣來容漫叟居

次韻

符曾

翩翩四十盛年時
風貌依然玉一支
往事但拈重碧飲
新聲自教小紅吹
繞庭愛聽斯男頌
落筆都成幼婦辭
況是浴蘭天氣好
綵絲名字最相宜

君才直欲比芙蓉
莫說雕蟲技未工
上國有人都識姓
小山無樹不成叢
休如石燕徒知雨
祇學秋鷹自振風

顧我甲庚先一歲何妨心跡略相同
冰雪仙人邱壑情日餐白石兩瞳清方從真逸爲通隱
更讀南華學養生時引魚苗臨水坐每攜鶴子踏花行
閒來試檢長生籙知在丹臺第幾名
蛾眉肯使鬢毛疎鏡裏豐姿尚自如終恐閒中羈駿馬
不容灞上策疲驢藤花落處書名日杏子紅時得意初
還祝廿年歸洛去板輿將母樂閒居

信

四十真成強健時儘教書策足年支苦無花萼堪同集
賴有墳箎得竝吹五畝閒居聊自適十分春酒不須辭
香茅新結東西屋恰與清行瘦坐宜

收拾年光筆硯中現前有景狀難工碧琅玕放籜初解
紅茵替香鬚滿叢聯袂喜來今舊雨披襟涼受暮朝風
從君日昔相酬和更乞新詩報阿同
殷勤相切友于情得與蕭閒世外清橫几烟巒消永晝
對牀風雨話平生讀書亭下鷗波淨視膳堂前雁齒行
還喜斜川美無匹他時應繼好聲名
曉影矇矓照碧疎紫荊花下樂何如騫騰雲路思良驥
蹙躡泥途笑跛驢偶夢池塘吟草後每尋春柳聽鶯初
年年手採昌蒲獻親向先生祝起居

中秋同欒城葯林意林作

好懷明月裏初染桂花香水木竟如洗石臺高始涼平分

秋思渺清入夢魂長無限蛩吟意多依草露荒

過慧雲寺觀張約齋書陀羅尼經幢今支施生石
和敬身韻

細認殘經斷蝕餘藤花延綠幾凋疎荒碑更臥斜陽裏猶
紀淳熙舊日書寺有樓攻
媿書碑

同欒城重過慧雲寺

空餘鴨腳老中庭壞寺僧孤晝亦局野水無情任秋碧王
孫花草劇飄零

九日過白雲山房有感

風流耆舊遠盡日掩秋堂野水落寒石亂山低夕陽白雲
從過眼黃菊又初霜空有琴書在塵封已半牀

十九日顧楫欄招集湖上時蘇堤新栽楊柳涼影
可翫因誦竹垞先生綠楊如薺酒船來句漫成一
律

輕陰晴破遣愁媒載有行廚及研臺紅袖隔花秋水渺綠
楊如薺酒船來愛看種樹添新蔭重賦登高屬健才惟我
啞羊無轉句相尋蓮社契宗雷張君無夜精究
內典譚禪竟日

送欒城葯林之京師二首

一杯憐易醉三歎黯無聲人去秋冬際帆開風雨生儉貧
交路寡慷慨出門輕落葉江城閉相思雁又鳴
金臺尋舊侶相見幾升沈客子聯蓬影秋冥入壯心荒程
斜日易飛雪過江深曾念歲寒裏蕭然棲故岑

愛日堂詩集卷三
與葯林分手河干暮雨初作黯然歸賦二首

細雨黃昏別去情淒涼萬點挾風生卽聽此夜孤篷始離
卻鄉關第一程

小山香謝芙蓉老秋色都消一夕中君上河舟我歸去詩
篇酒醖忽西東

樂城葯林別後雨雪驟作寒甚憶賦二首

憶著行蹤烟水遙西風北雪更蕭蕭抽帆人遠寒山外孤
驛殘陽雁影消

黃花秋汎洞庭船載酒青山得句聯兄弟關門聽落葉把
君詩卷讀燈前

次韻顧楫欄過蘿軒先生別墅感懷

寒扉雙掩認溪隈汎破秋烟一艇來畫閣空招山影入林
風還度水窻開香參金粟靜中味松老白雲深處栽惆悵
謝公絲竹遠晚波流響自生哀

楫欄招游湖上舟泊西泠橋分得冷字

輕舸總向渚邊停宛轉山青列畫屏篷底客閒秋瑟瑟橋
門風急晚泠泠綠翻牋色寒波竝暖入衣香薄酒醒日淡
雲濃好光景新詩高唱入蒼冥

秋寒

驟怯凌兢刺骨生霜天搖落轉孤情寒歸樹底催楓色秋
老蘆鄉逼雁程雨閣幽慵憑酒健涼襟淒永似禪清蕭條
惟有昏雅在竝羽西風噪晚晴

吳興吳楞巖過訪贈詩次韻

幽居惠訪到巖阿未獲彈箏與酒歌風氣後來慙獨秀才
名老輩屬君多纔通半面能傾倒欲和清吟費揣摩他日
水程烟驛裏弁陽佳處任諧訶

冬暖梅花盛開同樊榭汎舟湖上二首

孤豔橫枝水竹邊九冬時作護霜天今年不作消寒事羸
得梅花小雪前

裹茶牽櫂出寒汀遠水如烟曉月冥欲寫生香何處著赤
闌橋外倚山青

晴冬園梅早放折寄樊榭

寒林晴日暖生烟檐外無人疎影偏折寄心朋好消息一

枝花信及春前

試燈夜初晴次樊榭韻

如雲翠侶壓微黃緩踏晴餘匝路香烟火春燒花外煖畱
犁青試月中光喧來傀儡通梅巷坐竝笙歌泥酒堂祝願
燈前連五夜婆婆風物費料量

上元雪夜

月燈雙掩上元看閒坐春情雪夜闌誰與籠綃搵玉笛畫
屏愁淺落梅寒

堇浦乞方竹二首

玉瘦風棱削不如臥枝方折水天虛想君飽看亭陰下似
對碧瞳陶隱居

雨餘分種碧琅玕五月初添小閣寒素壁底須臨畫格綴
風黏月誦方干

王石谷水墨秋蘭用田居先生韻四首

幽香絕不染塵沙片片西風葉葉斜烏目山人原好事春
花不貌貌秋花

遠攜珍惜珠江種秋水風神正可憐小摘簪來蟬鬢底祇
宜蕭澹薄涼天

落墨生香一番新描來臭味倍相親屏開對此醒幽夢敬
枕橫眠總泥人

花葉飄蕭意思閒圖成大好不敷顏浮根粉本分明寫移
自都梁一角山

寧峯精舍紅葉次壁上韻

取次楓亭路沿溪點石痕夕陽頽古寺秋影落寒門得句
索禪解滄泉窮水源西風殘菊在相對淡無言

不到崑光十年偕南垞鹿緣意林及兒子一清登
絕頂值曉雨溟濛寺僧出觀前人和香山畱題詩
冊內明高忠憲公一首辭意澄澹字畫古勁讀之
不勝悚瞻二首

攝衣幽磴竹風涼憶舊重來選佛場絕頂江山見窗外忽
飛江雨斷山光

名山只合壽名賢邈矣風流墨尚鮮至竟東林生氣在問
誰懷弔汨羅烟

次韻鹿緣過訪北墅別業二首

城根水氣渺空烟
楓老霜容著遠天
最好漁灣似墟落
淺蘆邊岸上牽船

蕭寂如僧作啞羊
年來卻笑鼠銜薑
較量風物真無價
黃葉村兼魚稻鄉

己酉九月九日登高同南垞巨川用陶靖節己酉歲九月九日韻

黃花澹籬下相要成
久交急來屬盈把
轉恐雙鬢凋伴客
酬令節夷曠愜登高
倚風清嘯發冷然
薄層霄一秋託
呻吟中心徒傷勞
揮手撥塵堪坐石
撫琴焦遠契玉局
翁百篇追和陶洮
燈幾回誦聊以永今朝

蘇

秋盡日意林南歸赴北闈三次矣

來去經寒暑何堪到幾番
寒驢書篋敝落日帽檐昏
玉雪驚摧謝家人強笑溫時新喪小男無為三走怯秋律好還轅

醃菜次敬身韻

冬菹專餉負鋤翁
俊味常留澹泊中
鹽豉下來堆白甲
霜根斷處削春葱
園官擷竝元修美
法譜新翻女籀工
贏得寒庖殊嗜好
一生食籍笑無窮

蠟梅四首和敬身作

萬松嶺上黃千葉東坡句勾引詩人遣凍春
今日開山推別

祖城南好句獨傳神

明豔黃姑點鬢絲
倚烟臥水晚晴時
北枝寒瘦南枝小
妍

鬪風前憶素兒

栗玉金鈿初見知一時標格重京師吟餘嚼蠟味無味輸
與黃陳賦小詩

鶴膝枝分一掬冰輕綃護惜意凌兢撚來細樣軍持供灌
浴思同清瘦僧

餅中蠟梅

疎圓鶯子色冷護道人心紙閣招黃綺銅餅注水沈清交
澹面語寒伴臘醅斟房蜜蜂來誤曦窗趁暖尋

立春前四日同南垞鹿緣意林汎湖探梅五首

重湖漠漠水雲癡交割春頭臘尾時忍凍尋閒懷舊蹟儻
荒難問水仙祠

堤

羣峯寥寂雪初乾商略西風艇子寒單櫂夷猶渺空際第
三橋認赤闌干

酒坐餘杯倦未還水寒花潔伴蕭閒斜陽一角林烟外不
了南宗黛筆山

長提一道軟于絲老嬾差勝腰腳便宛轉孤山山後路牽
船直到墓門前

疎花涼月立空堦埜燒昏烟入莫佳畫本當年洪谷子冥
心只有趙彝齋

送南垞歸石門二首

雪橫風驕帆不前黃昏來上下河船酒醒倦枕殘年客收
拾溪聲到耳邊

迢迢烟水疊，寒付與青猿。一擔安歸仗，郎君腰腳健春

溫篷底語兒歡。

令子字豐來迎同歸次日立春

奉訂南垞看梅，先以詩寄懷。

長定花時許，卽行花飛春水與鷗盟。一緘催寄燒燈後，慎勿相尋高臥名。

庚戌元日喜晴二首

簾閣玲瓏鳥雀喧，晴烟侵曉入蓬門。冰鬚欲試微凹凍，檢取南窻向日溫。

豐穰私喜到慵饒，晴暢梅根早破緘。樂事年頭拚一醉酒，花狼藉上春衫。

晚立池上三首

翛然一吟身，孤詣自迢遠。空林夕陽微，冷花春意挽。小酌不成醉，潦倒風懷劇。竹禽噤叢喧，寒光曳蕭碧。光景何飄瞥，輪干又到庚。憐渠新節物，雙鬢與俱更。

上元雨中看梅

月華偏掩上元明，一夕冥冥細雨生。小院簾櫳燈欲罷，落梅烟水笛初橫。祇憐寒壓和香住，無那殘聽徹夢清。憑仗東君好持護，別花人最惜花情。

十七日喜晴坐梅花下

淄淄深宵冷雨連，一回看逗嫩晴烟。風香初上晚鬚白，簫鼓競追寒月圓。春盎魚跳徵暖信，蟄逢雷動祝豐年。

是日驚蟄

雷作雨止焚香散帙成清課，排日花闌占榻眠。

雨止喜梅花猶未開竟

續續飄殘雨後梅寒來猶未五分開水禽翻捷下紅啄黏
上白英唬石臺

早春同繡谷樊榭汎湖看梅期敬身不至四首

高出疎花雪色圓石邊看了又籬邊忽逢船尾銜春去橫
篴孤吹水外烟

只許清華交水石更無風格比渠清赤闌同倚青山暮牽
動吟魂片月生

柳搖鶯子鬪纖羣依約春腰著一分無那斜陽不成舞空
憐寒借鬱金裙

朝攜畫榼遲空冥錯莫鷗盟竟等萍烟權欲歸歸未得迴

風吹住水心亭

欒城旅館津門屢招不歸寄詩促之兼柬葯林

來去郵封疊繞腸相思七十二沽鄉久依賢者邀親盼速
替羈人計累裘有意淹畱非繆誤無端錯莫曷更張寄詩
招踐溪山約已負梅花兩度香

明鄭貴妃金書觀音普門品經八首

卷首題云大明萬曆甲辰

年十二月吉日皇貴妃鄭謹發誠心沐手親書觀
世音菩薩普門品經一卷恭祝今上聖主祈願萬
萬壽洪福永享
康泰安裕吉祥

壞色鸞紋幾劫塵當年宮事謾題論承恩特請饑民繪天
子呼來善女人

番經廠裏見蓮臺綠刺觀音鬢絡開跳步也隨弓樣窄中

秋來舞萬年杯

黃屋何來鄭主乘
松風狂客捏名稱
知他佛力生因想
絕倒烏臺睡語憑

雙淚如鉛絮語中
銀泉他日馬嵬同
白頭宮婢淒涼訴
一昔欷歔夢覺空

碧海青天恨有情人閒
流落筆縱橫西宮福不唐
捐日那解蜚言鄭福成

慈寧皈佛早宏宣
花貌分樵吳帶傳伴供
六時禪誦去菩提樹底
九蓮前

翁合猶能踞奧援
春濃別殿怙專恩
梧桐夜雨生相妒
會憶當年哭闔門

彌戾消除一卷攜
名香三沐寫恩私
隄麋清謹堂恭進
呵手絲綾裏筆時

臺閣梅用東坡紅梅韻

妝臺暖放故遲遲
晚占春風香過時
線可貫花生五葉蓮
會解語竝千姿
遮闌點點鬚分影
臥水層層雪暈肌
一種清華官閣樣
和羹應取最高枝

賀南垞得孫

繡裏花縐如玉雪
充閭言頌到賓朋
平頭一老偏能飲
千里名駒大有稱
述祖他時同謝客
分甘今日戲張憑
正逢節物元宵近
懽賞春風試月燈

令子來云正月十二日生孫

蕭山雨行

城頭月色晚生暈江郭鳩聲早帶愁一陣雨風騷颯裏麥
鬚桑眼冷如秋

舟過陶家堰

小市人聲水宅寬誰家樓閣倚篷看竹叢蕭瑟清音戛憐
惜晚花如許寒

山陰道上舍舟放步

眼底晴光散沈寥意行沙岸自迢迢任他一葉中流去卻
背斜陽過石橋

樊江晚泊

酒力初消倦不支水烟昏杳費尋思綠楊風細紅橋遠日
落行人喚渡時

清明日拜先嚴墓

春露摧胸臆空山上冢情江逾兩險阻

先壠在上虞渡錢塘百官柳記

五清明

先君歸葬已更五春

老大淪鄉井酸辛只弟兄黃昏燈色暗

風木起哀聲

先君夙好園林不肖構堂供奉遺像石門袁南垞
搨贈王百穀八分書風木盦額卽以顏之復得文
衡山風木圖幀上題詩一律爲其先人溫州守而
賦哀音感觸灑淚次韻與意林同作

追思嚴父幾呼天歸寄偏逢本命年

先君順治辛丑生康熙辛丑歿

落木

飄風多所感妙書名繪兩無前重江渺矣空池館寒食淒
然上隴阡寂寂虛窻遺像在那堪回首夕陽烟

同作

信

九京遺恨痛彌天
腸斷秋風已十年
幾觸悲思來畫裏
那堪蕭瑟挂亭前
紛紛點葉和悽淚
簌簌寒枝覆古阡
時憶墓田歸路遠
家山遙望隔江烟

愛日堂吟藁卷三

愛日堂吟藁卷四

仁和趙昱谷林

小山乙藁之四

湖上看桃花偶成五首

葑林自京師寄遺高麗墨二笏用東坡孫莘老寄墨

四首韻賦謝

雨中種芍藥

紫芍藥

雨中翦芍藥次意林韻

雨坐池亭上

小滿坐雨

汪井西墨菊次敬身韻二首

題蘇耕餘學博小照

讀宋遺民方韶卿集

近得高麗墨二枚分遺繡谷樊榭及敬身來索無以

應請三君用山谷謝錢穆父松扇韻賦詩辱示依韻
酬謝

再用前韻寄敬身并遺琉球扇以償高麗墨之請

次韻敬身湖上汎舟 楊梅五絕句

送天台陳畹香之長沙省其尊人南陔先生

題袁宇豐報春圖

九日南垞繡谷樊榭堇浦敬身家弟意林集隱几山
樓用少陵九日藍田崔氏莊詩句爲韻得千字

過慧雲寺有感三首 十九日偕友人出門見菊

余以紅醋餉敬身易其家醞作詩三首寄之

敬身次前韻見答再投三章

題樊榭三山紀游卷用宋人趙冰壺焦山摩崖韻

十二月十一日借來繡谷樓攻媿集與意林及兒子

一清取架上別本校閱日暮風雪甚作際此殘年共

親燈火殊自適也 辛亥正月五日寒坐

人日喜晴二首

壽門自山右歸過訪不值畱示冬心齋硯銘次樊榭
韻題贈

樊榭堇浦西溪看梅余不及行獨對庭梅憶作

制府彭城李公清明汎湖招讌同志館諸君賦謝

渡江二首

九月二十一日先君諱日自康熙辛丑見背已歷十

週延僧冥薦感賦

郭外山挽辭

得欒城蒲州札二首

黃梅二首

胡澹園有西河之痛相遇于湖上作三絕句慰之
湖上四首

十月十五日尋青衣泉登紫陽絕頂

游雲居寺

小除日燈下作

賀南垞得第二孫

寄懷欒城葯林用元遺山羊腸坂韻

十一月二十有五日早至玉泉

十二月九日雪止月中獨坐

雪霽

倚樓雪作

對雪懷意林在志館二首

月中殘雪未盡

戲贈堇浦納姬人十首

湖上看桃花偶成五首

桃花帚子染紅春邂逅何緣見洛神直似藍橋雙板下衣
前扇後總消塵

風暖重湖湖草薰船開尊俎列如雲卻逢三月嬉春好花
色酒香消十分

小艇放生池畔艤船通宛轉記游巡多情祇隔琉璃地占
斷花陰與麗人

一曲簫聲一縷愁闌干風細上簾鉤長官亦遣游春騎新
插楊枝過馬頭

過了清明纔到家隄邊正擁游春車晚枝畱取碧桃種夾
岸鬪開紅白花

葯林自京師寄遺高麗墨二笏用東坡孫莘老寄

墨四首韻賦謝

輕煤篆烟松偏稱猛州工殊品勞遠至得之販海翁黝光
點如漆隱隱雕雙龍摩挲足珍惜重出雞林宮研試還默
坐光彩映簾櫳元雲滴蟾蜍蘸筆俯飲虹連宵風雨橫觀
此破愁容

時當春夏交雙扉掩白版素心渺燕雲相思幽夢綰松風
集研聲晃漾初破眼入水果不濡纏絲致尺簡來札云此
墨入水不
濡堅等紫磨金旋磨費削刻斂手作薑芽咨嗟增顏赧

先人有遺研清水注蟲齧教兒親簡編讎字紛落葉甚欲
購隄麋今喜獲雙玦鴨綠與混同萬里致匱篋感懷良朋
意悠悠中心結濡豪生輝光古香侵繭帖

異物未云寶墳典有明戒小斑烟雲供聊用償吟債分韻

擘蠻箋鴉塗青壁疥客亦頗嗜奇高談破天械別出中山

樣扇紙徵瓌怪時南垞出示
琉球扇紙那更新羅酒佐余食齏蟹葯林

又惠乾
蟹一封

雨中種芍藥

沒骨生花趁雨栽黃塵玉立看裴徊琉璃葉翦欹風舞繭
栗香含待暖開清曉數枝閒倚擔殘春無事獨登臺劉郎
當日曾修譜一一芳名檢校來

紫芍藥

阿紫偏矜時世妝揚州好咏匹花王賜同珍貴蓬萊號染
出風流鶯管霜沒骨可憐侵暮色四枝爭賞發奇香闌干
六六生相竝妒煞陳家十八孃

雨中翦芍藥次意林韻

婪尾枯殘恨雨絲愁心空唱想夫憐初辭烟砌傾紅淚易
觸風懷拾翠鈿畫補折枝春可借屏遮半面色邀鮮將離
賦罷腸如割續續相思又一年

雨坐池亭上

銀箭橫飛柳外汀汀搖烟柳柳圍亭闌空一陣風騷浙吹
入蘆苗幾葉青

小滿坐雨

苦雨疑天漏分流滿澤涯節催交四月諺聽動三車諺有
動三淅淅寒蘆迥層層暮閣遮池塘新草綠意氣屬鳴蛙
汪井西墨菊次敬身韻二首

屏卻雌黃褪夕陽寫成疎澹片痕香知他尹白翻新樣依
約西風小著霜

只宜秋雨點隨陽不著花花綠綠香多事吳人偏善治何
如赤盞賦黦霜淮南子宋人善畫吳人善治謂能賦色也
張以寧翠屏集赤盞希曾肅慎貴族工墨

題蘇耕餘學博小照

眉山似續數文雄講席諸生頌至公徐始豐推師範立聶

東軒較宦情同十年總領湖山勝一顧能令冀北空殊媿
沈身竟如斷春風容易到溝中

讀宋遺民方韶卿集

宋室遺民早汗青空憐斷冊付飄零天荒地老不同死賸
水殘山胡獨醒是處相尋空結恨一朝搜贈果通靈知他
有淚傾如霰把卷長歌許劍亭

傳惜非完本

四明鄭義門允其後裔某訪求存雅堂遺集今世所

近得高麗墨二枚分遺繡谷樊榭及敬身來索無
以應請三君用山谷謝錢穆父松扇韻賦詩辱示
依韻酬謝

雞林之墨堅畫紙擣試藥圭審疑似海天需伴筆札來紫

服羅巾給房子兩丸分遺松聲寒麝香月墮青峭山從今
謝卻李公擇鈔取略盡相知閒

再用前韻寄敬身并遺琉球扇以償高麗墨之請

研光點漆可鏡紙烏玉玦形毋乃似松烟恨不貯三丸餉
供蠻箋寫丁子科斗名丁子見稗雅敬身喜作篆籀幾日舶趨風吹寒摺扇
宛轉來中山珠宮冷氣壓三伏合置君家懷袖閒

次韻敬身湖上汎舟

湖烟淡淡曉初收清味相知一汎遊茶片裹來香出紙酒
人招得意同鷗無多綠意風前權大好碧虛水上樓南浦
客歸還惜別船頭蕩日且淹畱

楊梅五絕句

微楞刺口檢冰奩百顆中邊一味甜白皙可憐生越女不
將線紫薦紅顏

五月江鄉正作梅齊裝千擔健帆開蕭寥昔日香山老合
伴題詩孤館來

水沈寒色染胭脂千貫珠丸乞定瓷上品勻番誇月曬幾
回紅想試鐙時

剡溪游侶認簪星香重雲鬟幾葉青風味過江殊不惡阿
誰來賞到臯亭

繁華舊夢銷清夏無復苑冰染指寒生香壓擔吟復嚼好
句不落梅公酸

送天台陳畹香之長沙省其尊人南陔先生

荆楚歲時久思親獨遠行白雲勞客夢湘水渺江程茗飲
畱連語驪歌繾綣情高堂從會面羈旅笑顏生

題袁宇豐報春圖

嚴霜凍雪白清華贏得寒香絕品誇次遞春風三百樹一
枝先賦狀元花

九日南垞繡谷樊榭堇浦敬身家弟意林集隱几
山樓用少陵九日藍田崔氏莊詩句爲韻得千字

高情初似淨居天草樹全身露碧鮮秋士登樓逢九日故
人歸路卻三千

堇浦自京師歸

祇憑佳思來詩裏未許塵襟到酒

邊池館清幽幾回顧芙蓉柳外自娟娟

過慧雲寺有感三首

愛日堂文集卷四
荷葉枯零菰葉稠岸風搖動兩颼颼青山白水關何事閒
煞斜陽一片秋

寺旁野水浸城根寺裏殘僧祇閉門遺像斷碑都寂莫冷

吟詩句弔王孫劉後村清涼寺詩遺像有塵龕壞壁斷碑無首立斜陽今寺荒寒景略相似

難尋掃軌舊林泉遺事搜將記一編回首悠悠惜歸去晚

風吹袖石橋邊余近欲輯南湖小志

十九日偕友人出門見菊

逃離鹿眼晚花黃淡淡西風作意香未許先生稱閉戶會
逢今日展重陽

余以紅醋餉敬身易其家醞作詩三首寄之

寒街迢遞走奚童蘭臭相親投報同束帶祇修迎畢卓緘

瓶專餉易曹公拈來小戶三巡後呷過良醫一味中醉士

吟身分認取君當摩詰我無功

鳴酢瓊漿未易貪尋常嗜好有餘耽此中合指唯宜飲終
日相須恐不堪措大襟懷原自具麴生風味許麤諳瓶盆

提挈煩還往江路城隅一徑南

煎調百物醉千場偷得仙人玉粒方待佐葱雞添旨脆憑

傳麴餅製精良敬身示余造麴法桃花紅換梨花白三斗酸輸五

斗香若向吾曹徵釀造非誇東里定餘杭

敬身次前韻見答再投三章

輸君博物正慙皇清和琅琅氣壓霜掃竟風軒傾九醞漱
餘貝齒試三黃破除有豆嘲無豆寥落酸腸敵酒腸際此

消寒足高咏筒封絡繹但相將

方鈔元祕充佳撰事覈瑰奇疊韻詩千里千鍾連類指女
醯女酒竝名垂賓筵早識豐侯戒抱甕還思樹蠹醫爾酢
我酬徵好會實歸虛往謝相知

鳶肩客憶丰神秀羊鼻公饒氣格清咽咽犯同僧律飲休
休暖借醉鄉生平分總管督郵號竝黜茆柴小耗名強醕
胡來三十輩瑣醯幸解百千觥

題樊榭三山紀遊卷用宋人趙冰壺焦山摩崖韻
攬秀松寥舊蹟存客心憑坐費晨昏風懷蘇米平生寄詩
力乾坤一氣吞篆籀紆回哦古鼎水風寥泐動清猿卷中
大好江山助不遣飛塵到眼根

十二月十一日借來繡谷樓玫瑰集與意林及兒
子一清取架上別本校閱日暮風雪甚作際此殘
年共親燈火殊自適也

攤書危坐撥燈明深雪扃窻喜合并寄謝紅裙殊不惡十
分消受主人清

落葉愁橫勒帛觀排籤呵惜指棱寒風饕冰研膠如鐵罷
勘南檐日又殘

辛亥正月五日寒坐

尙覺春陽思力微吟身猶自戀寒衣晚來寂歷更無語乾
雪一番檐外飛

人日喜晴二首

今朝挑菜入年新強健居然屬綵人翦出畫旛隨意插也
教蓬鬢頓生春

晚街疊鼓鬧鄰兒我亦風懷不自持水月一鉤詩思起柳
庭梅院好裁辭

壽門自山右歸過訪不值畱示冬心齋研銘次樊
榭韻題贈

汾水初回客袂風一緘裁與瘦金同良材盡入鐫題內新
卷隨攜道路中爵拜通侯傳石氏名標鳳味自坡翁閒尋
青子紅絲在老共芸窻脈望蟲

樊榭堇浦西溪看梅余不及行獨對庭梅憶作
春水纔能勝一航同聲牽率櫂歌長人生消此清無價占

斷寒花任夕陽

匆匆已自負花期一誤真成百日思過眼落梅風又緊重
樓幾度玉橫吹

伴我聽唳翠羽雙朗吟高潔拓幽窻西溪小住風吹雨共
惜飛香在石杠

遙岑分入暮樓青欲指尋梅路杳冥盡捲西簾倚檐際一

橫烟碧認秦亭

園中小樓
盡見西山

制府彭城李公清明汎湖招讌同志館諸君賦謝
柱石才謨

聖主知久綏南國進恬熙花隄柳港開生面黃帽青烟繼
昔時江海名藩分使相班曹清地授宮師請從歌詠趨塵

後周雅重賡吉甫詩

宿昔因緣許接延，即看住世有神仙。湖山主席陳肴核，瀛嶼賓階奏管弦。都會成書需大筆，烟霞名蹟屬新編。余分志湖雲龍追逐逢佳節，祝願同聲借酒前。

渡江二首

江路蒼茫趁曉行，淺波遙涉起寒情。帆開待渡客來少，冷雨桃花細細生。

雁影江關漸遠空，一程爭指海雲東。年來賸有松楸淚，柳戶清明墮客中。

九月二十一日先君諱日自康熙辛丑見背已歷十週延僧冥薦感賦

手澤長新祇斷編，每逢家忌思緜緜。奉心兩弟依形影，望壙重江隔水烟。蚤夜立身終有忝，冥幽報德總無邊。人生到此嗟何及，空下窮泉淚十年。

郭外山輓辭

知交摧謝後，東國想人倫。逝矣遺文在，蕭然宿草新。問親垂竝老，有子不全貧。揮淚寢門外，因風絮酒陳。

得欒城蒲州札二首

汾水鴻程忽到南，沈郎游倦合思還。裁詩報謝君知不，我亦看山几案閒。來札云蒲州無一可人惟中條王官几案閒物耳余新起層樓盡望湖上諸山樂復

不減

離悰僂指記三年，石老藤蘿柳長烟。若肯歸來尋舊好，一

雙老鶴故依然

黃梅二首

冷貌香尋凍不生銅壺冰瑩伴人清
斜榜午鬧蜂聲起暖借油窻一朏明

南燭青松類一方山家作供儘相當
道人著意憐黃子怕捲重簾逼曉霜

胡澹園有西河之痛相遇于湖上作三絕句慰之

感君涕泗日縱橫掌上珠遺一顆明
觸撥昔年思子淚曾將斷句寫鍾情

亡兒志清之天有詩哭之

去來今說總歸空二十餘年彈指中
驗取三生書臂上他時重見顧非熊

聞令嗣歿時牽挽阿母書復生兒胡某于臂上

玉雪恩憐苦自逃南華觀物死生齊
中年易得傷哀樂臨水當山且少嘯

湖上四首

贏得銷金是一鍋收將佳麗付新歌
別開生面花隄上樓閣迢遙壓水波

昔年李制府曾添設神廟及幾處景亭樓閣

晚水寒生細細風聽吹寥泐玉丁東
尚書不上重門鑰足了公餘未礙公

山南烟榜一枝迴山北歸來且覆杯
乞與斜陽散金碧愁無好手畫樓臺

誰問孤山處士橋墓門風起劇蕭蕭
卽看高豎重修碣好酌寒泉慰寂寥

酌寒泉慰寂寥

十月十五日尋青衣泉登紫陽絕頂

閒身懷古漫歌謠一掬寒泉滴莫朝陸記繁華空惻愴唐
撫風雨漸烟消崖痕碧浪何年贖洞口青衣昔日招時復
攀蘿來絕頂澄江白練起秋濤

游雲居寺

山路幽尋到女牆寺門寂寂禮空王百千競市囊中藥十
丈隨行竹裏廊施食有臺餘老樹翻經無榻只斜陽孤蹤
來逐秋風冷指點中峯選佛場

寺中僧盡懸壺賣藥射利殿宇摧壞荒寒蒿目

小除日燈下作

朝來喜遇一陽生獻祝慈幃有弟兄藥鏡還人兒去病梅
堦得月婦分清講餘奧易天心見讀過南華世味輕嬌女

殷勤壓鍼線篝中拈引夜燈明

賀南垞得第二孫

新詩又媿寄荒蕪來賀君家第二難用元遺醉裏顏唐雙
接膝燈前含弄竝牽鬚連枝最喜形依影比玉爭看璉與
瑚他日齊聲秉笏笏迺翁誇客足懽娛

寄懷樂城葯林用元遺山羊腸坂韻

昔別重陽把菊看天涯游子竝霜鞍匆匆去惜畱無計惆
惘貧兼老更難坐我窻寒風料峭勞君書訊竹檀欒於今
夢續京華後取次并州路曲盤

十一月二十有五日早至玉泉

筍輿發清曉山谷月荒沈霜花抵積雪凌兢氣難禁別澗

逕逾滑鼓薄謀孤尋忽轉青石橋幢宇輝遙岑玉泉道場
古重新鬱香林愛此一方玉澹佇朝曦臨瑩澈不可唾羣
魚失幽深水氣濛濛上巖嵐結重陰深決散千畦珮環來
清音空亭翼然峙高揭眎洗心人非以水鑑未易超潭泔
逝者如斯夫俛仰成古今文鱗幻寒碧憶吟尾尾金靈悟
邈千載法乘餘悒悒龍象紀撫掌塑壁風雨侵

十二月九日雪止月中獨坐

雪作意蕭蕭黃昏聽初歇風饕掠面過幽凝滿林樾雲達
忽散朗矯首半規月少焉纖翳淨冰壺擬天闕寥寥塵氛
驅浩浩神氣越豔照耀空虛飄蕭蕩巉峯百尺樓孤迥一
曲池滑笏姮娥矚瑤臺滕六走銀窟襍褫鶴夢驚玲瓏簾
影揭太素鬪妍姿瑩澈數毫髮蟾華剡溪回縞衣廣寒謁
淒永兩不禁偎爐煎楮梅枝皓魄融尤憐玉爲骨石堦
數逡巡清響宜薦襪懽覆掌中杯《巡酒花凸》

雪霽

已餘鱗甲玉龍歸庭樹喧來乾鵲飛騷屑風吹雲母粉零
殘寒畫水田衣隔江山勢清雄近繞屋梅枝擁腫肥淺碧
玻璃仍凍合陽溫三日轉陰機

倚樓雪作

高樓風四面人倚雪花中寒壓雁聲小白漫山影空祇憐
雙鶴伴惜不故人同私喜歲前卜明年炊餅豐

對雪懷意林在志館二首

酒闌飛雪莫崢嶸色借虛窻透紙明閒煞南華堂夜永不
來燈火話平生

知爾消寒與文譙笑余排日只詩篇明朝暫作歸來計正
好梅花賦水邊

月中殘雪未盡

臙粉輕彈畫本開月中零段數峯堆天公買得鶯溪絹要
倩倪王合筆來

戲贈堇浦納姬人十首

豆蔻初含小小孃愁論萬斛幾曾量日來煖老方爲玉除
卻溫柔不是鄉一自通媒居曲陌卽看挾瑟上高堂青裙
白袷肩相比好處風流似陸郎

今朝消息到香蹤白舫青簾突地逢昔昔朝雲催暮雨時
時雌蜺戀雄蜂纔愁花面分明見未許王昌放浪從斜背
銀釭如懵懂到關心處最惺忪

幾番惆悵爲分攜贏得南珠一串齊綵鳳飛身常竝宿伯
勞生性只單棲探春小院愁如海中酒香釶醉似泥我實
憐卿卿惜我底須夫壻嫁金閨

窄逕匆匆行跡微漫愁中婦月明歸傾城小怯餘紅淚名
士今憐有綠衣碧海多情真繾綣巫山輕夢記依稀朋箋
試手成雙調風月相知定不違

袴花石竹隱紅鮮翠袖尤憐日暮偏山曉清清分掃黛羅
平貼貼替裝絲五更夢醒今何夕一縷魂銷若个邊大好

橫波割秋色回頭欲去幾遷延

寂寥誰與散清懷合惱從公爲遣差雪正一簾飄研席錦
虛半臂滯官齋餘香翠被明金鴨冷凍銀杯白鼻騮細細
更長孤館裏爭教此夜竟成乖

時堇浦畱
宿志館

顏色桃花未上身流鶯纖嫩不勝春蕭郎忽地風情起阿
母前頭宛轉親可愛慵情薄梳洗更憐秋水作丰神而今
腸斷生疎處羅薦猶嫌夢裏新

神女高唐賦正忙忽無憑準惱襄王麝旣睡去嫌明月羅
綺愁來生暗香一晌相將太匆遽平時片處費周防闌干
纔著相思了怪底妝樓易夕陽

紅閨長養得纖纖望遠懷家別思兼弄玉心情行惘惘破

瓜午紀恨慊慊易消臂上石龍子漫學籠中比翼鷓飛絮

迴風任飄泊春泥三赤不相黏

姬年
十六

玉貌依微想像難雪增瑩澈月增寒大堤花豔驚郎目小

袖雲藍待所歡湖號鴛鴦爭采秀扇歌鸞鳳卻羞團一從

市上招搖後不博金錢不與看

姬平
湖人

愛日堂吟藁卷四

愛日堂吟藁卷五

小山乙藁之五

迎春四首

正月九日立春用元遺山乙未正月九日立春韻同
意林賦兼懷欒城葯林 舟過石門悼袁南垞

松江道中絕句

曉登烟雨樓

同季弟次乾舟過武塘先君曾司鐸是邑賦此志感
董浦京師來札中及 詔開詞科卻寄

湖上荷花个庭繡谷樊榭意林同集鏡水樓二首
个庭以蕉葉代紙共題詩于上詩成投之斷橋流水

南湖看月招同樊榭三首

旱甚望雨晚窻霎然因誦白石道人人生難得秋前
雨乞我虛堂自在眠句各拈一字分賦得難字

立秋後一日雨後湖上以雲澹水容夕雨微荷氣涼
拈賦得微字

次韻樊榭七夕苦熱戲效西崑體

雲閒寓樓望橫雲山東个庭樊榭意林

哭个庭

哭繡谷

十月二十有五日過復園見白牡丹二朵正開用

坡公和述古冬日牡丹韻四首

主第一孫命名德元

甲寅元日立春用坡公甲寅元日過丹陽明日立春
韻

元日喜聞鐵巖大兄陞戶部侍郎

大兄擢戶部甫兩月旋以原銜充

經筵講官寄賀

第二女于歸陸氏

松江雨中遲意林及兒子一清不至

懷陸敬仲壻并寄遺松江粉箋

次韻樊榭意林夏五雨後登隱几山樓望江湖諸山

寄懷之作余時客游雲閒將歸

過黃浦

黃耳冢

五月十日舟過臨平去秋个庭經此誦參寥詩甫罷

疾作今予來憩安平泉上遠矚沙渚藕葉如雲感念
良友裴徊增悼歸舟賦二絕句

次韻樊榭病疴初起 客示墨牡丹詩索和

半月泉

答謝山京師寄柬并及穆堂先生李公惓惓于予之
意速予北行謝未能也 觀弈次友人韻

重九後十日遣懷寄意林

武瞻錢丈以余有京師故人之招卜得周易大過見
示賦謝

武瞻錢丈攜獨立小照索題圖作於康熙乙未今年
且八十矣披圖鑒貌風神殊不減於曩昔書此應命

時雍正乙卯長至後九日

送个庭匱安居黃泥嶺 答葯林京師見寄次韻

家大銀臺容齋先生恭遇

皇帝龍飛御極奉

命代祀南鎮會稽山賦呈一律

恭呈舉主臨川李公四十韻 有序

少司農大兄恭遇

新天子御極

覃恩贈封四世一品殊

恩異數

鸞誥寵錫迎奉里門宗老孫曾忭懽鞠脰觀者稱榮敬賦

小詩四章敘述祖德所基兼頌大兄顯揚之至意云
題行久從子遺照

松谷崑麓兩兄以余北上攜酒過南華堂餞別追敘
平生紛然離緒三兄賦詩見示依韻報謝

迎春四首

壬子立春
前三日

大寒越十五維斗指東北迎東方者春蠢蠢滋生息
天子重農事敷和紀木德長官咸肅敬順應乃其職武林
一都會所重九郡國四時關卒始八方起稼穡勾萌方出
達華精啓陰塞蟄蟲驗始振陰退陽不忒悠悠阡畝閒羣
然歌帝力我樂同幸民洞庭汎春色

土牛南城南田車東郊東迴風吹妍雪鼉鼓聽逢逢儀備

十日先遞辦取諸公縣官稽成例社夥趨如風導揚逆始
至五化歸元功唱擬角音似舞學翟羽工伶優喬媿嬋旛
幘演青紅都盧尋撞輦百戲百不窮猥以無賴子謔浪冠
帶蒙利市街道士官府豪門中勞賜有青蚨都將囊橐充
迤邐康衢過倏忽巷陌通喧填士女語奔走兒童同相傳
看春好宜遇不宜空又聞踏雪行時年卜屢豐

農分早中晚立春準後先孟陬之上旬農事中無偏舉鞭
鞭牛碎分送舊例傳德溥勤惠施青珪蒼精前葭灰候陽
暖菜甲挑生鮮太史書且上勾芒祀復專翦紙宜春貼鳴
鼓戲鉤牽紛紛遺綵勝翼翼傍花鈿凡此助條達農祥晨
正宣起作迎春樂載稽皇覽篇

游魚負冰池東風始寒綠雉响雞乳初柳放柔條束朝
廷寬詔下出入宣滯獄相迎豁門闌全無關鑰觸土陽瘳
墳盈耒耜良用足招呼農大夫春及再三告

正月九日立春用元遺山乙未正月九日立春韻

同意林賦兼懷樂城葯林

交年臘鼓鬧鄰家催上新幡兩鬢嗟馬耳春風歸夢底羊
腸行跡任天涯已飄雪片更番雨小住梅魂望斷花點檢
辛盤會兄弟南華堂裏讀南華

舟過石門悼袁南垞

語兒溪上過感緒卽紛紛我實念朋好誰能離故羣城頭
孤月落樹底暮蟬聞僅得遺蹤在看書白練裙南垞善書
亦齋壁多

有遺
墨

松江道中絕句

烟景迢迢數去程晚來篷上薄涼生飽聞駟脚成弓勢美
滿風吹正好行

遠渚微茫起櫂歌鴛鴦湖汎白蘋波船脣幾葉青蘆進一

夕野塘秋思多前二日
立秋

五更夢醒不成眠殘月荒荒墮水田蚤有人聲集溪市論
筐白小販生鮮

亭林指是讀書堂風味還思顧野王水問西湖流一派涓

涓寒碧秀州塘卽官
塘河

泛泛如漚幾問津飛禽撲漉碧鱗鱗誰憐陸瑁湖邊客百

頃烟波著此身

吳松迤邐夕陽昏蟹舍魚村早閉門見說風波浦裏惡夜
深潮落泊城根

遙山一點海門青晴色宜人倒酒瓶約略水程三百里浪
花衝過落帆亭

兩日夷猶得暫閒匆匆底事一朝還重游記取償初願徧
歷九峯三泖閒

曉登烟雨樓

風景瀟湖異崇樓起水鄉曉烟秋浦澹殘月四檐涼荷氣
侵衣袂菱花漫石塘闌干拍空際獨發浩歌長

同季弟次乾舟過武塘先君曾司鐸是邑賦此志

感

武塘城下暫維船觸撥孤情便惘然桃李問栽知有幾弟
兄相望不能前蕭蕭蘆岸搖空際小小河房架水邊風景
不殊人事異至今舊業祇青氈

董浦京師來札中及

詔開詞科卻寄

癸丑

憐君刺促未還轅病起緘書報弟昂抱玉別來餘涕淚移
文勒後重邱樊無媒舉世知皆賤感遇何人得借言慙媿
才名今第五祇應散帶住衡門

湖上荷花个庭繡谷樊榭意林同集鏡水樓二首
何來篷底有餘清香入涼襟細細生望斷紅情兼綠意迢
迢花葉不分明

隱暑山樓任夕陽花光分卻半湖光閒心難覓風前句遲
客先題蕉葉涼

个庭以蕉葉代紙共題詩於上詩成投之斷橋流

水

蕉葉如萍付遠空碧琉璃滑任西東他時莫誤天隨子詩
橐曾藏像腹中

南湖看月招同樊榭三首

黃昏清似曉風吹辨得閒心赴渺瀰卻憶秀州烟水闊殘

塘夢斷獨來時

去秋薄游雲間曉上烟雨樓水風烟月極相似也

披披六月藕花洲白月經風借得秋許結南湖漁隱社冷

香分唱作清游

王孫蕭寺記張家寂寞城隈水一涯昔日繁華空有夢今
來夢亦少繁華

早甚望雨晚窻霎然因誦白石道人人生難得秋

前雨乞我虛堂自在眠句各拈一字分賦得難字

三伏愁慳雨秋前得更難響先梧葉下涼到漏聲殘况瘁

紆田父惟虔藉長官長吟白石句清思透冰紈

立秋後一日雨後湖上以雲澹水容夕雨微荷氣

涼拈賦得微字

晚荷經雨惜秋微長定尋花花打圍淼淼波分菱葉鏡披
披風散藕苗衣清歌白石詩仙句涼掩孤山處士扉放浪
閒身寂無語西泠小住看鷗飛

次韻樊榭七夕苦熱戲效西崑體

秋河耿耿碧霞空殘暑相侵離恨中月上虛櫳攜簟卷瓜
陳小院拭冰融洗車望斷連朝雨駕鵲難憑此夕風贏得
人閒小兒女并將涼意乞天公

雲閒寓樓望橫雲山東个庭樊榭意林

昔城秋正早餘暑苦未散光陰客裏消來賞復昏旦登樓
見遠山秋影橫如岸供我几案閒青翠數零斷靚妝膏沐
洗眉嫵神秀粲林高日罷霧浮圖光爛爛微風始幽響迢
遞入虛館顧陸託微尚書堂鶴為伴晚景送遐矚軒乎擬
天半何當素心偕白月紛紛看

哭个庭

樂城新號个庭蓋以夢兆得之

秋風正酸楚默默結微緒故人抱沈疴良愈實跂予

時繡谷病

劇不圖惡耗頻先悲喪儔侶君從蒲州歸突兀見眉宇驚

喜同夢寐重以敦夙敘離思罄六載一朝消閒阻忽傳令

子疾又作茸城旅中年傷哀樂衰老已如許臨平山下路

僧句誦荒渚

舟過臨平尚誦參寥子絕句俄而疾作竟不復一語而逝

寒厲易中人救

敗策莫禦歸休乎君來奄化無一語老婦極摧傷孤子倚

兒女親死久未葬幽魂痛邱墅畏友既云亡頽波挽誰與

小山洵零落中夜悲辭舉吾當哭諸寢庶幾獲處所

哭繡谷

昨日沈郎徂今日吳公死一時風義乖三日失雙美

兩君相繼

下世纔隔三日耳

聞君甫弱冠清劭識渟峙聲名四十年儕輩實

君

披靡博物類張華儲藏養經史詩歌金石聲瓶花映齋
書聚黃金散大獲西鄰訾平生躋場屋浮沈淹閭里同氣
感頰弁相失痛無已神疲今喪吾顛頽復何恃辱吾俯訂
交飄忽歲月駛久要踰十載氣味淡于水通家禮遇我兼
好弟若子方期道誼永何圖賢哲萎初邁微疾耳固祝勿
藥喜誤修越人術沈縣竟不起淚揮秋冬閒數占辰已止
淒風撼樹頭哀音纏澗底 朝廷開制科薦牘定公是謂
有連茹象君當為隗始南中少微隕名老身不俟無命復
何如斯言良有以

十月二十有五日過復園見白色牡丹二朵正開
用坡公和述古冬日牡丹韻四首

霜明玉貌總風流綠盡芳叢不掩羞腰鼓何曾敲百面天
公判斷卻無休

披披蕉葉挂牆風白頰清酣暈薄紅若便交朝天作雪徐
郎生面別開工

太息詩人去作仙謂个庭繡谷對花吟徹似唬鶻事多意外吾

何怪人自飄零花自妍

花疑頃刻在林園檢點南榮好負暄佳種何須染靈藥任
他誕幻說仙根

生第一孫命名德元初生時徧體色紫更名紫衣兒

種德培元肇錫名護持繡綵與花綳呱呱三日唬初好爛
爛雙瞳氣亦清昨夜維熊佳夢兆今朝健犢小同生德元與其

父皆以丑年生一經我已多荒落漫說黃金貯滿籩

甲寅元日立春用坡公甲寅元日過丹陽明日立

春韻

椒漿菜甲竝前陳時日拈書觸手新華頂暗增纖縷雪寒
梅初破一分春鞭牛出土先和令紀歲逢寅又競辰爲謝
天公殊省事百年難遇慶農人

元日喜聞鐵巖大兄陞戶部侍郎

丹詔初啣下紫鸞華班清要立朝端賢聲藉藉高民部風
望稜稜佐地官財有常經惟奉法職關敷教總能寬弟兄
遙賀
恩優渥盈溢蓬門新歲歡

大兄擢戶部甫兩月旋以原銜充

經筵講官寄賀

春秋素業抱遺經

兄治春秋發科

曳履絢絲侍邇英會計九州傳

內相論思三昧重西清偏承

講幄龍顏近喜卜天庭黃色明何以齋心答

高厚獻圖無逸稱家聲

第二女于歸陸氏

練裳竹筍幾支吾阿母愁分掌上珠嬌女詩憐織素似比
肩人與陸郎俱當筵卻扇先行賦後夜明燈獨自呼爲誦
風箴好相祝時修酒食當於夫

松江雨中遲意林及兒子一清不至

愁霖已過十日滴烟靄常侵四壁昏伴我畫禪圖沒骨祇
消茶熟與香溫

新得董宗伯沒骨秋山圖寓齋展玩少破岑寂

懷陸敬伸壻并寄遺松江粉箋

箋封百箇粉爲光更有新詩伴寄將我媿鷗波退三舍陸
郎風度似王郎

次韻樊榭意林夏五雨後登隱几山樓望江湖諸山寄懷之作余時客游雲間將歸

東吳足梅雨熱逢海隅溽層樓幾延思客子勞遠目有弟
雁心孤憶我西頭屋凌虛發高唱同調酬珠玉好詩寄題
箋粉研蕉光綠湖山歸夢遙渺焉結幽穆輒笑類賈胡久
爲塵塊逐起來看山影橫雲一峯獨潮落泛鷗閒谷水澹

澹淥風柔理歸櫂晚颭篷窻燭

過黃浦

旅跡託吳淞黃梅匝月雨有客牽帥我刺船入黃浦風馳
沉瀼裏帆脚健于弩斜塘三泖波從此百谷聚懷哉春申
君粵稽名氏古而我上逆潮激盪日亭午下舟順駛來不
知逆者苦東望海門寬水氣狀青怒又恐颺風至江豚出
拜舞日落菰蒲聲嘔啞答柔艣

黃耳豕

眼底烟波著處濃閒尋陸氏獵原茸憑誰指點黃尼寺野
水空邨又幾重

俗呼爲黃耳邨

五月十日舟過臨平去秋个庭經此誦參寥詩甫

罷疾作今余來憩安平泉上遠矚沙渚藕葉如雲
感念良友徘徊增悼歸舟賦二絕句

一舟風蕩過臨平藕葉香先花氣清日暮高僧詩句在故
交流恨入泉聲

消得閒愁信有身一堦綠潤染涼茵無端滯跡偏梅雨幾
憶西湖烟水新

次韻樊榭病疴初起

卻喜人間寒熱除得閒覓句勝方書如君蘊藉身難隱似
我棲遲計定疎流浪江天羈客返

余方從雲間歸

遷訛歲月壯心

虛曲池大好幽居得盡日相親水藻魚

客示題墨牡丹詩索和

不與尋常設色開此花端合洗塵埃憐渠斂手空惆悵費
得胭脂幾許來

半月泉

在德清

明月隔幽巖落水似弦上更鑿經好事劈規作新樣蝦蟆
恆見食兔魄未全望俛矚潭影虧檐雲空蔽障判劃古菱
花偃形類交韞得閒經竹院小憩獲微尚討舊遡曩昔靈
號咸和勅名蹟寧寡和寺壁記慈相

答謝山京師寄柬并及穆堂先生李公惓惓于予
之意速余北行謝未能也

寒臥虛楞霜日移憐渠穴紙凍蠅癡疎蕪華髮存公道悠
邈良朋辱遠辭獻玉輒傷和氏足生金難鑿賈逵碑一從

塵事輕拋得好踐梅花雪後期

觀弈次友人韻

簾影垂垂放好懷閒觀對弈足清佳中分局上平心見悶
到談時信手排紙畫縱橫空作戲橘傳誕幻正無涯積薪
試聽中宵後睡眼瞞瞞幾復措

重九後十日遣懷寄意林

堂堂兀坐送居諸老我黃花耗餘欲覓韓陵一片石北
方文字竟何如

武瞻錢丈以余有京師故人之招卜得周易大過
見示賦謝

躊躇出處總樊淆共濟何人類苦匏感謝公明先示我不

教無遇始觀爻

武瞻錢丈攜獨立小照索題圖作於康熙乙未今
年且八十矣披圖鑒貌風神殊不減於曩昔書此
應命時雍正乙卯長至後九日

幃中題識廿年強凡鳥難棲海鶴傷三紀太平新甲子更
須飽啖五雲漿

送个庭匱安厝黃泥嶺

斂魂傷密友新草合荒阡雨屑何無賴花飛劇可憐谿山
明素旄身世悶幽泉曩昔追游跡惟吟歎逝篇

答葯林京師見寄次韻

孤蒙只合老江域名氏何由達上卿千里緘詩誦冰雪十

年懷舊話瓶笙小園閣名昔年觴咏于此幾牽鹿友雲山夢誰主鷗翁烟水盟珍重故人商出處不勞簾下問君平

家大銀臺容齋先生恭遇

皇帝龍飛御極奉

命代祀南鎮會稽山賦呈一律

新膺景福自天申望秩虔恭寄重臣巨鎮南維山殿古靈旗東護海邦春銀臺專使承

褒寵高足封馳代遠禮敬選良辰元命告大書歌頌勒貞珉

恭呈舉主臨川李公四十韻有序

今天子龍飛乾隆元年春正月某日戶部侍郎臨川李公

遵奉

詔旨在朝公卿各舉所知待應博學鴻詞之選以四人備

廁薦牘其一卽也竊惟

朝廷稽古右文特開制科原以旁求鴻生鉅儒儲備

顧問典綦重已如昱浙中愚劣淺闇寡聞久棲畎畝遲頓

場屋自問爲溝中斷梗不材佩瓠何敢仰希當

道延咨垂眄猥以棗稅之材重負曠殊之典寤

寐難安悚惶無地迺名卿志厲風俗宏長道業

辱采虛聲過蒙獎藉曾無半面之通竟置貢名

之列公忠體國莫罄頌揚蕪穢呈詞鏤誌雲霞

云爾

乾健符堯紀隆平敘禹疇文星占景麗相室藉鴻庥令德
君陳懋清風吉甫謳仙根傳上姓臨水鎮方州詩派西江
接文瀾九道流規隨

皇運葆光輔

聖風柔位列元和重名稽龍朔侔委蛇明退食颺拜副先
憂允矣文章伯皇哉忠孝侯開天方穆穆統紀自修修樹
善垂青簡書勳羨黑頭榮名蜚玉筍夙望卜金甌丹桂洪
桃植南金東箭收清標真蘊藉力學仰弼彪風節冰霜見
君臣魚水游等身書日富材館錄頻搜縣宇坏陶下儒林
發藻秋政先賢路闢謠第從臣優儉壹丹臺領方聞金匱
紬制科崇舊典

明詔布遐邱白屋延賓閣青袍感仄幽貢名遴得雋充賦
拔其尤是乏他長錄公無半面謀旁招邀獎借連茹及卑
陬薦陸思逢吉援蘇感始歐萬言慙賈董四俊媿程仇檢
牘風吹怵穿楊射命鞬瑣材誠下走舉主重傳騶自顧鯁
生爾堪膺大對不閒編聯復絕溫卷削而投豐劍冲城起
胡琴入市售例隨旌羽下全集偃波求讓友希黃穆無媒
意馬周翕然裴垺論卓爾季方儔賈倍連城璧光分近水
樓喬雲興靄靄甘露降油油羅列珊瑚網繽紛麟鳳洲煌
煌呈寶鼎濟濟戛鳴球韞櫝原懷玉披沙爲獲鏐典墳供
枕葑才諳費彫鏤不負名卿意溪毛或薦羞

少司農大兄恭遇

新天子御極

覃恩贈封四世一品

殊恩異數

鸞誥寵錫迎奉里門宗老孫曾忭歡鞠臚觀者稱榮敬賦

小詩四章敘述祖德所基兼頌大兄顯揚之至意

云

虞江別祖實遷杭天水孫枝衍慶長命世賢豪多自立起

家耕讀果能昌華門圭竇流光遠白髮青裙苦節揚會有

殊恩推錫類喜教奕世姓名香

王父傳經課子孫蟬聯科第有淵源生前老守青氈業身

後榮叨

紫綬恩架上殘編遺澤在笥中敝服儉風存鄉閭此日相

爭羨羸得人稱通德門

御軸龍鸞賁隴阡

主恩優渥頌如天義方是訓長垂範慶賞延施屬象賢孝

德書將斑竹管友于歌擬棣華篇艱難創業爲家督作則

尤教勤儉先

四世

殊恩均一品

九重新命埒三台巍巍士族衣冠接奕奕清名臺閣推忠

孝文章持報 國英賢耆碩競羅才羣誇金紫華宗袞鼎

鼎相期定作梅

題行久從子遺照

五載玉樓人已杳重題秋草斷腸詞篋中賸有媯娥畫屬

賦風花似昔時行久臥病日曾屬題馬湘蘭畫上有王百穀詩迺馬亡後所作余即用其韻有此段

風花屬趙昌之句

從子常憐清拔才謝庭蘭玉早相摧愁予此日添惆悵水

驛山程憶幾回

松谷崑麓兩兄以余北上攜酒過南華堂餞別追

敘平生紛然離緒三兄賦詩見示依韻報謝

弟兄相守只青氈少壯蹉跎年復年欲別牢愁無語解且

同風雨對牀眠折來垂柳初分影輸與閒鷗共浴川我獨

黃塵遮日去幾回鄉思繞吟鞭

原作

殿成

疇昔辛勤共一氈風規相賞幾經年紬書每愛三餘暇

琢句常縈五夜眠已羨文章雄海內又看頭角出寒川

日華賦就承天寵莫忘連枝未著鞭

愛日堂吟藁卷五

愛日堂吟藁卷六

仁和趙 昱谷林

秋芙蓉吟藁之一

余自乾隆丙辰秋入都戊午秋南歸畱滯燕臺涉逾
三載歲月遷訛人事違忤秋士獨謠消憂暇日唐高
蟾云天上碧桃和露種日邊紅杏倚雲栽芙蓉生在
秋江上不向東風怨未開善夫詩人知所怨已茲集
自始出門及居京邸所作凡得百二十餘篇題之曰
秋芙蓉吟藁篋攜以歸時重九之明日谷林山人紀
于汶上旅舍

過三塔灣

召伯埭

高郵

次韻樊榭題淮陰旅壁

次韻樊榭七夕清河道中遇雨

登傾蓋亭

曉發泰安道中

謁嶽廟

謁羊太傅祠

白溝河同樊榭次壁閒韻

趙北口曉行次壁閒韻 途中憶家三首

得樊榭抵家之信賦寄 寒月

題伏櫪圖

和舍弟意林南歸畱別之作次葑林送別原韻

再用前韻送別意林

讀葑林詩卷見有贈余應試之作有感次韻

冬日寓齋讀葑林詩冊書二絕句還之

寄和崑麓四兄哭子詩二首

靈椿篇

有序

移寓

病起

憶內

橫山宮贊示和蔣罔卿齋頭菊花自秋歷春香色不

改詩四首索余次韻

冰魚

并序

十二月廿九日得舍弟到家消息二首

除夕前一日司農大兄見貽桃花探春二種卽唐花

也報謝二首

丙辰京師除夜二首

丁巳新歲書賀大兄并預祝七十誕辰

立春後三日大兄招同令貽東壁寶臣京寓小飲次

韻四首

元夕招秋田謝山東壁寓齋聚飲三人俱大戶秋田素稱健者東壁徑醉傷鼻謝山作詩有安得猛士之句以戲之卽和其韻

春雪

并序

春雨次東壁韻

和大兄七十自壽詩原韻四首

京師芍藥以白者更佳香色兩絕爲賦二首

白丁香

大兄見遺 賜葛一束製袍服之賦謝

同心十瓣蘭次西顥韻 賦謝葯林見遺滄酒二瓶

東西顥津門爲余索滄酒二首

客攜南酒至謝山見之苦索分餉一榼并詩戲之

葯林以近詩見示閱畢書後

秋日游萬柳堂和無動居士題壁韻

禁城聞柝

秋田來京師出示渡江望金焦諸山之作憶余去年過此欲賦未果讀之憮然觸于懷也次韻二首

重九日有懷大兄巡視運河未歸

喜大兄巡河還朝卽用中秋東昌坐雨原韻二首

又奉和宿旅館原韻 賦賀大兄晉秩吏部侍郎

過三塔灣

由拳城下路杳杳客心孤寺塔看昏黑林燈在有無遠村

涼雨過一夕暑光徂幸得偕元度推篷話淺蘆

召伯埭

淮流如駛聽鳴沙古埭殘蟬落日斜
茆屋低危秋水漲更於何處覓荷花

高郵

晴湖淼淼布颿揚一片新秋在異鄉
欲向詩人覓佳句蒹蘆人語憶秦郎

次韻樊榭題淮陰旅壁

旅壁題詩夜羈孤異客航楚風徵俗變
淮水問流長行者休言瘁征人但乞涼
王孫迷舊跡釣澤屬漁郎

次韻樊榭七夕清河道中遇雨

秋事感佳夕征衫著雨勻避風來野舍
涉水問途人馬怯雙蹠滑詩慚一字貧
今宵天上侶津渡亦艱辛

登傾蓋亭

藉有萋萋束帛爲此風千古足相期
天涯一餉低何裏人語孤亭落照時

曉發泰安道中

雞鳴起脂車請火索鞍箠促客無他具
盥漱草草爾試路漸覺平出山云此始偈
仄盡曲盤涼月墮野水馬蹏認幽澗
蹠石散齒齒照眼秋花妍生碧渲染似
僕夫歌且行伊涼淒聒耳

謁嶽廟

大東青不斷作鎮奠維坤徧雨從膚寸稱宗定一尊樓高
海甸迴柏障蘚碑昏蟻蝨心瞻切摳衣拜殿門

謁羊太傅祠

停驂祠下月朧朧西倚徂徠氣象雄憶昔華勳開晉室于
今盛德頌羊公鳩人信在交兵日緩帶思存名士風聞道
中郎猶有女清標宅相自相同

白溝河同樊榭次壁閒韻

荒溝憑弔客愁餘風景燕南刺眼初自昔有人常設險於
今何處問儲胥分疆終爲全遼守割地先成石晉疎舊跡
低徊一吟罷幾行斜墨壁閒書

趙北口曉行次壁閒韻

曉程遙望水邨過淺碧蘆雛舞浪婆趙北空明真戀此江
南清潤更云何繁華帝里雲龍近慷慨秋風今古多韻險
頻敲鞍背穩認旗沽酒一當歌

途中憶家三首

絮雲嶺上覆如巾每憶尸饔實愴神潔比白華方是養歡
謀菽水始言真平生頗羨迴車客此日還同捧檄人京洛
迢迢游子去幾堪矯首望秋旻

此日無端別淚揮卅年辛苦共牛衣月侵壞壁秋蛩冷枕
背殘燈旅夢歸兒女青紅君病遣輪蹄膠擾我心違何時
得踐龐公約相守滄江在釣磯

清宵風雨促人行話別殷勤有弟兄老去羈孤纔領略天

夢日堂吟集卷六
涯涕淚獨縱橫寒氈傲矣名心減青鏡依然華髮生南望
參差數歸雁長空有字恨難成

得樊榭抵家之信賦寄

念子棲遲甚旋歸慰客心雕鏤誇玉楮濩落感苔岑已遠
冥鴻意仍耽萬卷淫梅花春劫外一笑謝升沈

寒月

自怯金波冷長安夜更明風尖將雁白霜緊上樓清倚檻
年華近依人鄉思生嬋娟誰與惜黯黯獨關情

題伏櫪圖

丹青妙手繼曹韓兒出英姿虜舍觀爲惜龍媒閒歲月枯
其空齧對奚官

和舍弟意林南歸畱別之作次葑林送別原韻

我住君歸淚不禁燈前一掬酒杯侵羸來破夢藏蕉鹿輸
卻還山倦翮禽洗眼風軒看竹色閒身水石臥松陰琴材
寂寞中郎少千古空遺焦尾音

再用前韻送別意林

天涯游子意難禁獨返南轅風雪侵事去蟄蟲憐屈蠖歸
來烏鳥感靈禽尋思舊蹟金臺冷貫酒寒冬燕市陰誰共
羈人消夜永鄉心時逐雁淒音

讀葑林詩卷見有贈余應試之作有感次韻

砥砭何敢假璠璣此日空懸招隱書舊業漁樵終屬我故
山猿鶴總憐渠爰占嘉遯幽貞寓賦售凌雲夢幻如絕倒

常時騎款段路旁爭駛乞兒車

冬日寓齋讀葯林詩冊書二絕句還之

袖出新詩一卷輕烏絲鶯絹界分明寫君寒餓梅花句咀
嚼牙關冰雪成

輕縑素練淨流犁正始東方左史齊句琢輒紅塵土出辟
塵今不用靈犀

寄和崑麓四兄哭子詩二首

感君思子夢魂中今日難尋地下蹤悲逝老懷當境慘鍾
情獨自釀愁濃人生到此原難料天道胡爲竟莫容千里
寄憑詩句苦霜風雪月哭窮冬

阿咸痛赴玉樓年我亦心摧泣遠天見說鸞皇歸夢幻空

教醫藥費金錢三生尚想精魂返九地徒憐長夜眠幸慰
膝前依幼子愛河難割總淒然

靈椿篇

有序

寒冬無事獨坐寓齋葯林過存攜靈椿詩冊見
示以今秋所居前後徧生椿樹數十本一夕風
雨長尺許靈異特甚南華經云上古有大椿以
八千歲爲春八千歲爲秋椿誠嘉樹也葯林私
喜爲家公年幾七十康強逢吉草木效順其在
此與作詩紀事中敘合并相依之樂余有白髮
慈親惘惘出門人事蹉跎寄跡京華蕭然臥病
迴首南華雜誦之餘不堪三復拈毫賦此以述

羈懷乾隆元年丙辰小至日識于燕臺寓舍

一別輒十年臭味通寤寐君作賈胡留我甘瓠落棄握手
聚長安歎息訴顛顛讀君靈椿篇起予白雲思年齒近知
非遲莫得無類嗟我嚴父背中腸悲嗜芟有母實尸饗寧
昧白華義投老忽出門行役且攜季健羨繞膝歡靈木徵
奇異祿養勿嫌薄旅食京華寄勸余為小畱居大恐非易
雲羅望鸞鶯沙蟲莽蠕蚊鉤鐔錯精鏐鉛刀亦可試一發
既不中誰信莫邪利舍弟先我歸甘旨代我侍慈竹種檀
欒春梅數三四業任農圃學書課兒子肄毛生祿弗及奉
檄償素志仲氏米可負為貧適遠地白髮事高堂古今理
一致與君用作歌聊效萊子戲

移寓

遷次謀杯酌幽居撫幾巡徑成花作客巢似爵來賓人遠
街西跡寒迴舍北春時長至後一日鄉心何處遣鄰月笛聲新

病起

病起披裘倦自支挑燈獨對臥房時寸腸欲斷姮娥月鄰
笛回環又早吹
端居似水景光流漂泊黃昏醉始休鄉夢迢迢尋正好麗
譙添得六更不

憶內

憶卻臨期正病中徑麾別袖語匆匆幾回歸夢吟魂擾千
里緘書藥物充閒我風塵看冷暖羨君兒女數青紅時遣第

三低徊薊北霜寒夜只有清輝與影同

橫山宮贊示和蔣罔卿齋頭菊花自秋歷春香色

不改詩四首索余次韻

隔歲花開三徑家東籬佳色住鮮華別花人欲尋花史春

暖名杯對紫霞

沈兢菊譜臨安菊花異品有紫霞杯等名

共異春前見晚香青霜著後色成緗一枝冷淡依然是爲

語東風護草堂

冰天歷後倍精神似此蕭疎孰與倫不許春蘭稱獨茂秋

心兼雪又兼春

賸有黃花伴酒尊微微香氣雜溪蓀天公若便陽和借枯

卉寒叢亦望恩

冰魚

并序

橫山宮贊見貽天津冰魚一筐大皆寸許晶瑩

凍合宛然琢成小魚在其中雙目點漆如畫急

付廚人爲羹洵嘉味也與東壁同賦

鏤冰白小自天生雙目描來點漆成傳語廚人休鹵莽煖

消初試異南烹

十二月廿九日得舍弟到家消息二首

還家消息遲音書珍重郵來逼歲除人憶故園春草碧白

華詩句補閒居

聲名藉立邀先達

臨川宮詹見贈南歸敘

離別縈懷有阿兄

謂司農大兄

六上長安復歸去詩篇滿篋意縱橫

除夕前一日司農大兄見貽桃花探春二種卽唐
花也報謝二首

隔紙天紅好護持地爐扶暖上寒枝不須待到春深後已
放柔肌著淺脂

春色先教透一分清姿曲閣貯氤氳小叢瑣細明如雪好
伴幽居到夕曛

丙辰京師除夜二首

寂寞京華五夜分那堪投老尚無聞長途冰合羈南雁永
夜燈明憶白雲客裏杯盤聊爾爾人前笑語任云云祈年
差慰他鄉意臘尾連朝片雪紛

千聲爆竹幾驚眠強起披裘賦縛船攬鏡羈人饒白髮持
門病婦守殘年煖偎石炭寒窻下春護唐花小几前此味
何堪經老大飄零無那任天邊

丁巳新歲書賀大兄并預祝七十誕辰

縹緗百軸

賜書傳恍到娜嬛一洞天講幄論思親

斧辰採風歌詠重裘旃

出示昔年奉使船廠詩藁

三朝報稱臣心矢五福便蕃

御墨鮮

世廟賜福字四今上賜福字一

竚待

鸞章錫難老賡颺增入紀

恩篇

立春後三日大兄招同令貽東壁寶臣京寓小飲

次韻四首

不速嘉賓倒屣迎試嘗名酒一邀評共經客裏逢人日喜
聽春來是鳥聲花市青紅催北地樊樓燈火擬東京憐余
抱恙回車轍孤負華筵謝阿兄

二仲經過禮數除何須從俗賀門書共誇彩勝新裘燕初
解河冰暖上魚人影婆娑傲坐舞月華窈窕進簾虛開年
排日消清暇贏得升平樂事餘

寒暄客語總全無真率相期足範模酒令翻新長鬪飲春
宵隔坐換熏爐友朋投分情求舊兄弟他鄉興不孤從此
流連好光景四時風月願常租

巢許無須戀笠蓑清時海宇散雲羅冠裳袞袞如公等裋

褐蕭蕭似我何門掩疎閒人跡少韻拈還往和詩多春杯
願借前相祝髮映酡顏正未皤

元夕招秋田謝山東壁寓齋聚飲三人俱大戶秋
田素稱健者東壁徑醉傷鼻謝山作詩有安得猛
士之句以戲之卽和其韻

孫郎咄咄稱假王遇此渴羌誰相當上頓欲謀千日醉招
來崇飲無腴荒燈火宵兵鬧酒國羣侯讓德德匪涼分使
督郵錄事隸尚書麴部趨明光入手銜杯復遑顧破除萬
事坐飲張所向似無一時傑公等背負寒生芒交綏略一
輒復敗欲書功績空旂常指揮糾政在幾謹寬猛相濟制
曰觴千鍾百榼樂醇化上追陶姚軼夏商無彝不聞有箴

誥惟德是頌辭喬皇無佛稱尊蔑秦晉岸然肯與曹鄴行
酒所大有跋扈客一軍獨全四明狂吳生棄甲歌則那蹠
蹠急避嗟蹠蹠來郢人運其巧旋加堊斲云何妨五百
年來無此樂痛飲謫仙玉浮梁朋好盍簪酬令節適此京
國未渠央他時歡會應記取壺中春盍胡能忘

春雪

并序

余寓居京師蕭然無事春雪盈堦寒意襲人讀

坡公聚星堂雪詩依韻成篇有白戰不許持寸

鐵語仍禁玉月梨梅練絮白舞鶯鶴銀等字

寒空萬里飛葉葉春日京華賦春雪天街突地聽無聲知
是朝來車馬絕掩幕爲愁撲面冷攜屐先防壅齒折地下

平量露井深檐花危積屋角滅煖硯微凹

平

凍色凝呵筆

雙手寒粟掣旅眠竟夜擁敝裘翠倚餘溫拋醉纈東風片
片呼輕薄紙閣時時響騷屑詩句孤高著意搜歲月崢嶸
轉瞬瞥昔賢佳會貽禁體禁語一一先數說號令崇新七
百年白戰不許持寸鐵

春雨次東壁韻

堦前春雨過一番客懷悽塵洗桃花豔雲歸柳色逃苦吟
猶避債拚飲竟成泥瑟縮林禽莫禁寒且少嘯

和大兄七十自壽詩元韻四首

南極星占

帝里春每懷忠孝答

君親身參

講幄明經義書

賜牙籤啓後人

聖世引年推翼舊臣心長日記

恩新錦堂酬唱多珠玉采綴瑤華總不貧

羅列綏桃麟脯珍喬松千尺等長身當筵杯酌何辭醉入

坐賓朋貴率真七十康彊饒歲月

三朝知遇荷絲綸熙和韶景盈庭集喜溢龐眉莫斂頰

躋堂生日作年年坡公賀子由生日詩但願白髮兄年年作生日華髮春衫二月

天繞膝諸孫庭際舞承歡嬌女掌中憐名卿耆碩清無竝

一品

覃恩光及前願借壺觴相頌祝芳辰桃李各爭妍

連理交歡棠棣思雲屏開賞及花時遙知鄉國相稱賀獨

喜京華得奉卮春暖山容常盎盎日移松頂故遲遲兒孫

七子多逢吉次第前來獻壽詞兒孫七男子次第皆逢吉亦坡公壽子由詩以樂城

三子四孫今大兄一子六孫正合詩語

京師芍藥以白者更佳香色兩絕爲賦二首

買貯名花近臥牀一枝玉雪更清芳客中漫惜春情減酒

醒更闌夢破香

朝來細雨養花枝雨過花香只自知卻恨去年秋雨夜離

人容易賦將離

白丁香

雪色生香貯案頭繁枝歷亂數清幽客中腸結春風暮花
欲愁時我亦愁

大兄見遺 賜葛一束製袍服之賦謝

歎暑珍三葛南天任土充方袍宜表素輕織試荃工鄭重
吳刀翦清疎江雨空涼恩分到骨無斃野人同

同心十瓣蘭次西顥韻

平分五葉一花生蘭解靈犀惜露莖幽處採香憐二妙秋
來紉佩字雙成同心曲水非凡草幻種湘潭定異名輸與
汪倫愜孤賞好拈重碧破愁城

賦謝葯林見貽滄酒二瓶

雙甕攜知 國禁除時方議酒禁孤高詩句百愁祛拈杯昔酒

生香處染指東風泛溢初斟酌正逢殘臘過沈冥何待十
年儲麻姑潭味今嘗得仙姥餘杭較不如

東西顥津門為余索滄酒二首

謝君相許南皮酒頌德還如滄水清依約到京三百里車
馳載得幾經程

燕市羈人懷抱開待嘗名酒一拈杯何時竟慰渴羌思準
擬秋風好遞來

客攜南酒至謝山見之苦索分餉一榼并詩戲之

遣憑健步一經程休羨前車載麴行南醞頗思鄉味美滄
醪還待故人情西顥許寄謝山滄酒底須名士離騷讀錯莫先生束
帶迎未許秋衾常欲近無何聊爾暫宜傾謝山方蒐輯石經又有夢熊之

慶故
調之

葯林以近詩見示閱畢書後

熏沐蘆簾紙閣前
錚錚冰雪卷中傳
感多舊雨懷人句
興託春鳧放蹟篇
一一清思能自寫
寥寥孤詣定誰憐
十年離索微吟寓
華髮相看各惘然

秋日游萬柳堂和無動居士題壁韻

林閒野水弄晴時
蕭寺關門晝影遲
塵外秋閒僧似柳
夕陽人去壁餘詩
流連舊跡遺碑在
寂歷他鄉醉客知
一餉新聲聽側豔
此心黏絮問禪師

禁城聞柝

皇城清署報嚴更
武士星敷屬五兵
徼道金吾纔警夜
禁

中銅漏遞傳聲
月明砧杵時相應
霜冷蝦蟇曉尚鳴

夢梁錄禁

中五鼓後擊柝謂之蝦蟇更

縱使閭閻雞犬靜
不教任意得宵征

秋田來京師出示渡江望金焦諸山之作憶余昨年過此欲賦未果讀之憮然觸於懷也次韻二首
大好江山看及秋
蹉跎三載記前游
奔湍衆水連天下
兀峙雙峯拔浪浮
自古繁華誇北勝
于今歌吹弄吳柔
憑襟清嘯會同客
落日蒼茫一少畱

隔江指點蕪城路
人語樓臺燈火時
烟抹晚山畱遠黛
月橫秋水掃纖眉
飄零憶我都陳跡
清傑輸君有好詩
後日滄波汎歸櫂
長謠重賦底須辭

重九日有懷大兄巡視運河未歸

遄發征途敢憚遙使星南指憶封軺漕輸先策神京重河
潤還分

帝澤饒鴻雁早聞驚獨客茱萸孤賞坐今宵秋風觸撥無
窮思時把行人眇暮朝

喜大兄巡河還朝卽用中秋東昌坐雨原韻二首

青齊于役又今年雍正九年奉差賑濟山東代恤蒼生到海天獨切民

依

明主念更籌國計使臣賢課工堅下淇園槿行水疏尋
趵突泉永逸一勞謀上策頻煩畚築爲渠憐

征途乘遽及秋時蹇蹇王臣兩鬢絲入告捫心知似水還
朝攜篋但餘詩盤堆紫蟹相邀共籬綻黃花未覺遲載得

江鄉春釀至過從聊具洗塵卮

又奉和旅館原韻

遲遲檐月上簾影捲纖微櫪馬初離箠征人亦解衣黃花

侵客瘦秋蟬點胥肥見蠍呼燈至今宵喜共歸大兄歸卽招飲席間

見蠍因誦昌黎照壁喜見蠍句以申隔闕之思

賦賀大兄晉秩吏部侍郎

綸詔朝宣慶燕譽天官特畀佐

宸居中朝清要當無忝衡軸公閒樂有餘報國文章推吏
部憂時開濟本河渠前賢冰雪風流繼春滿藤花香影疏

愛日堂吟藁卷六

愛日堂吟藁卷七

仁和趙

昱谷林

秋芙蓉吟藁之二

和松谷三兄阻雨旅舍韻

又和道上追憶當年先人交馳南北有感韻

又和趙北道上韻

聞內子病起有寄

長孫德元上學聞頗聰穎亦能誦讀賦此志喜
賦得爲有源頭活水來

讀後漢書戴良傳一絕寄示諸女

歲暮二首丁巳作于京師寓齋余年四十九矣

讀羅江東徐青藤詩句漫成二律

有序

十二月六日寄家書念老母抱恙漫迹京師未能卽
歸有作

憶西湖二首

謝客餉餅

臘月十四夜

除夕松谷三兄以家鄉攜來蠟燭二條見遺賦八絕
句報謝

大兄以

御賜挂麪及客餉安榴寄遺老母賦謝

奉和大兄戊午元旦早朝侍宴一首

蓮坡儉堂昆季相招津門觀燈以事阻不得往用坡
公祥符寺九曲觀燈韻賦謝

再用前韻東東壁西顛以致不赴看燈之意

奉和大兄自壽原韻四首時仲春十八日也

讀畫同葯林作

贈雨江

葯林惠西施乳與秋田牧堂同賦得西字

憶去年渡淮水

恭紀

聖主臨雍七言律詩四首

題陳節婦傳

余寄跡京華值五十初度大兄三兄見招聚飲以慰
岑寂并賦五律四篇贈示依韻答謝

生日馮鹿緣以詩見寄和韻酬答

夜來香

送鄒雨峯出宰襄城

題董東山編修山水

次韻葯林乞龍井茶

再次見謝餉茶韻

次韻次公壻讀首楞嚴經

夜坐

南歸畱別大兄卽次送歸原韻二首

行至廣陵知北闈已放

附南歸贈詩冊子并跋尾

題內子病中梅花小照秋盡日歸家展圖手書

和松谷三兄阻雨旅舍韻

詩情旅況兩綢繆夜雨悽人倦解休去路迢迢辨山影鄉
愁疊疊壓雲頭問程徒御還催發立馬荒烟且少畱此日
感君初作客蕭寥無那又經秋

又和道上追憶當年先人交馳南北有感韻

共憐鄉國沈身久始就征途竟遠行諸父勤劬當日事後
人追憶百年更步趨聲望含雞舌前大兄筮仕禮曹三兄今謁選部郎酬和
篇章集鳳城我獨青氈總如故牀頭辦取一樽盈

又和趙北道上韻

一片空明鏡長隄徑壓河水烟秋澹渺燕趙古悲歌蘆葉
吹沙渚漁人弄遠波語來風景好曾憶客同過

聞內子病起有寄

孺仲蓬茅樂隱俱偶然浪跡滯歸途十年病頓憐君甚百
事謀諸待我需掃地焚香常佞佛顚天瀝血竟剗膚老母病劇

內人割股投藥一服而起從今健可持門戶尤賴相扶白髮姑

長孫德元上學聞頗聰穎亦能誦讀賦此志喜

曾孫上學弄含飴隅坐分甘每自隨早已呼渠爲健犢今
當戲汝有佳兒田依杜氏勤將作安法龐公獨見遺寄語
阿翁今鑷白塵容無復挽鬚時聞德元日侍老母飲膳其
初生時余有詩云今朝健
犢小同生以與其父同丑庚也又余出門
後家人問其能記憶否云阿翁是多鬚者

賦得爲有源頭活水來

空明一片古滄洲俛視淵然與目謀混合天輪無外始潛
行地軸此中由性安潤下推來往風過文成任坎流素沼
常縈心浩浩碧潭無盡意悠悠澄鮮習靜方能會澹泞逢
源不易求翠翳搖光涵曉鑑雲陂浸月動虛舟平川呈象
須觀玩曠境披懷得溯游欲識崑崙起迴沓乘槎直上與
天浮

讀後漢書戴良傳一絕寄示諸女

顥顥明珠弄掌中

良五女皆賢
余亦五女

求姻輒許叔鸞同練裳布

被吾猶辨寒約先遺隱者風

歲暮二首丁巳作於京師寓齋今年四十九矣

荏苒知非暮齒傷二年京國繫他鄉有生多分成匏瓠到
處何能避角張鼎鼎年華今及艾蕭蕭肌骨已非強小人
有母衰兼病空眄慈雲憶北堂

底事冠巾定誤儒祇憑青鏡問頭顱非多似蝟慙蘧伯詩
冷如蛩媿達夫牛僧潛身便裋褐免置爲業老菰蘆南華
水竹年來負更負梅花春滿湖

讀羅江東徐青藤詩句漫成一律

有序

昭諫贈鍾陵妓雲英詩云我未成名君未嫁可
能俱是不如人青藤道人詩云越溪多少蓮舟
女老盡朱顏不嫁人意皆感士不遇余淪滯無
繆讀此惻愴于中用廣其意以落句成篇

江東詩苦獨傷神爲感朱顏未嫁貧文謝子雲空薦達賦
憐庾信劇酸辛壯懷荏苒成虛日客意蕭閒過好春如此
年華如此境可能俱是不如人

一葉扁舟江上身芙蓉對我淺含顰遷訛歲月遺空谷零
落雲容杳隔津蘭棹孤閒還自倚鷗波浩蕩只相親平生
多爲無媒誤老盡朱顏不嫁人

十二月六日寄家書念老母抱恙漫迹京師未能

卽歸有作

客裏歲云暮羈棲冰雪侵慈幃多病日游子望雲心吾土
憐湖海幽踪媿向禽封緘須藥物難覓紫團蔘

憶西湖二首

憶卻春前雪後湖今朝悔不學潛夫孤山大好尋孤夢夢
到梅花分外孤

竹外僧歸烟際寺水邊梅破臘前香無端身世多離別空
使湖山落故鄉

謝客餉餅

炊餅中廚具風清共客嘗起漉十字脆不換一珠光束皙
辭多妙吳均說又詳今知非畫地儉腹果然香

臘月十四夜

中庭俛仰壯心摧過眼年華入手杯餘閨蟾蜍偏客裏月

圓看到十三回

是年閏九月

除夕松谷三兄以家鄉攜來蠟燭二條見遺賦八

絕句報謝

小窻紅影一枝殘坐向宵分祇自看縱使有情空滴淚燄
花不解客心寒

細細風吹虛閣遮今宵著意護燈花夢符定博歸家喜底
事花消夢亦賒

一室綢繆爾獨攜歲華聊與遣愁時然心百轉思鄉切莫
道如灰了不知

老去難追少壯年名心戀此一燈前休嫌燕相終相誤一
舉餘明直自賢

重簾借暖漏聲催誰與明光見跋來閒倚短檠風不定高
燒香地數青煤

獨客歸攜近臥房春畱五夜澹青光銅荷一滴銷鎔易妙
手輸他蠟鳳皇

紅綴花繁一穗成空堂照眼可憐生蠅頭細字看如霧孤
負餘分四壁明

千枝鳳腦與龍膏帳裏還同甲煎熬小燄長明無盡意盤
雲空想九華高

大兄以

御賜挂麪及客餉安榴寄遺老母賦謝

若榴十子浥寒漿更束千絲餽飴香頤老丹砂房競裂加餐銀線箸飛長客回珍寄憑封裏

恩到餘叨拜賜嘗惟願年年得波及分甘佐饋頌

君王

奉和大兄戊午元旦早朝侍宴一首

清望山公整佩裳晚隨天仗列巖廊

慈宮蹈舞元辰會

禁殿趨陪萬壽觴懷裏柑橙分馥郁懷果九枚分惠諸弟外孫囊封筆

墨鑿精良除夜前一日先賜筆一牀墨一匣維新孝理臣鄰慶賡頌虞廷

樂拜颺

蓮坡儉堂昆季相招津門觀燈以事阻不得往用

坡公祥符寺九曲觀燈韻賦謝

問程三百有餘里折簡燈時獨見邀孤負相思發高興空將吟句琢春宵星輪海蜃工丁緩月駕蓬壺擬沃焦舊雨

新鷗總憐我感深良夜客魂銷

再用前韻東東壁西顛以致不赴看燈之意

三年膠擾風塵客為念幽棲屢枉邀此日自慙虛負約昨年同度可憐宵東壁來札及余去年除夜笑語云云之句分明綵繪金釐炬熏

燭魚龍碧海焦牽動梅魂吹玉篴江南歸夢劇難銷蓮坡札云

水西盆梅大放相招同賞

奉和大兄自壽原韻四首時仲春十八日也

繪絲

若箇不思親思親重此身遭逢明盛世增算豔陽春慶積
賢聲著寵邀

錫命頻扶疎融淑氣暖律長庭椿

眉疎京兆筆客宦廿年燈舊事重論過前塵悉記應披襟
冰雪淨結夢水雲層酒瓊詩篇寄清閒有髮僧

物理齊來久時推大化行忘私丹慤矢逸老碧瞳明教孝
遵前訓遺安實玉成兒孫羅列舞芳躅繼高情

淺醉藥欄傍紅妝照鬢霜自能尋樂地何待駐顏方十載
湖山約千春草木香弟兄吟客思得句卽添觴

讀畫同葯林作

城根春水碧灣環圖史幽人共往還小刼烟雲畱粉墨閒

評氣韻別荆關冥心孤賞倪清閔愛客同披顧玉山茗椀
爐香消暇日纖塵不到迴人寰

贈雨江

耳習清名結思頻何圖京國晤丰神蕭閒經卷勤三過醞
藉吟襟寄半春交以淡成方可久坐來醇飲祇相親客居
門巷欣連接落葉新詩與細論

葯林惠西施乳與秋田牧堂同賦得西字

海國鱸新價竝圭朝徵食指客來攜雪翻沾水匙膏滑青
憶春江萋葉齊舌本輸甘回味果竈觚纖淨辟塵犀風懷
試齧心先醉冒取儂家舊姓西

憶去年渡淮水

客程計淮水來往總他鄉莫問長淮路淮長思亦長

恭紀

聖主臨雍七言律詩四首

成均曉日望瞳矐黃屋青松翠柏中

法駕金鋪明曲瑤錦幢雲隊馭追風鈞天仙奏音初徹奠

幣齋虔禮獨隆堦下諸生齊舞蹈大昕徵衆鼓逢逢

主聖臣良理化成玉繩高揭泰階平膠庠設自虞廷重經

術修逾漢代明澡浴鳴謙來齒胄中和進學選鴻生園橋

觀聽如雲集逖播風聲仰

帝京

天齊睿質御飛龍訪落陳疇鷓鷯從

黼座傳心規帝典講筵明性進中庸

玉音清越聽環佩

寶訓崇閎樂鼓鐘此日

皇朝垂盛事泰符鴻藻慶三雍

經緯陰陽奠四維

聖躬參象奉無私春和上巳星躔胃瑞協靈辰樂命夔清

晏譚經昭日月太平典樂總

君師洪鈞一氣供陶鑄歌詠

皇風奏雅詩

題陳節婦傳

白髮青裙志承歡代所天桓嫠行義里衛媛柏舟篇艱瘁

孤將撫冰霜節可傳盛朝風教立巾幗早旌賢

余寄跡京華值五十初度大兄三兄見招聚飲以
慰岑寂并賦五律四篇贈示依韻答謝

客子棲遲日韶華過隙春我慚毛義喜兄念阿同辰旅食
兼垂老棠枝轉自親蕭騷雙鬢改寂莫未歸人

鄉思結南天悠悠及艾年轉篷嗟落魄游岳屬高賢臣朔
休言飽仙人肯示鞭此生萍梗似何用鬪媿妍

集非追歷歷暮齒怯心知得意鴻毛捷違途蹇足遲閒尋
翁子傳清誦達夫詩不信葵榴豔敷榮正向時

年年相願祝白髮兩兄情用坡公鹿夢真如劇蟹寒禁不
詩句意鳴琴書憐暇日藥餌說長生憑仗青蒲璣羈愁破百城

蓬

原倡

殿最

戊午天中前三日谷林五弟五十初度余與松谷
三弟稱觴京邸因口占五律四章爲壽時朗坪次
公學齋裕清靜猷在坐

未遂歸田願逢君五十春荷風來上苑葵日向佳辰聚
首三年老同堂七子親萱闈兒女祝絮語遠遊人

佳節正中天長椿莫問年靈砂縈客緒異地集羣賢寄
跡吳門卒畱情祖逖鞭獻身期不遠月窟晚花妍

行藏且莫計抱璞少人知鑄鐵何曾錯垂綸亦未遲青
蒲今日酒紅餅昔年詩此際君須記榴花正盛時

同氣開筵日鄉關萬里情我無離別恨君有不平鳴投

夢田堂文集卷七
筆誇前輩簪花屬後生今朝松柏頌待寄武林城

次韻

吳廷華

今歲殘無賴端陽尚惜春相於愁去日不敢記生辰此
意通吾友恆言慰老親庶幾百年客竝作善忘人
自識周公瑾醇醪三十年同心劇相賞千古定誰賢球
鎮原天府麒麟只玉鞭肯隨閒鳥鵲花底鬪春妍
小酉山居舊澄懷草木知相看百城富何惜一飛遲深
谷高林地風花雨竹詩客中幽夢在明月半窻時
葵錦傾紅意槐堦鬯綠情蟻浮千日釀鶴待九秋鳴天
路有同調芸暉笑老生讓君聲價重璧是舊連城

生日馮鹿緣以詩見寄和韻酬答

半生乾老芸窻蠹堂堂日月幾空度無端漫浪逐天涯身
世悠悠等萍聚債軍之將非楮柱躡足敢與矍相圍嗟哉
一發輒不中入山志計早宜固低徊少壯摧心胸文場藝
苑蠻觸攻一歌長謝彈鋏客五噫歸休廡下傭何如瑟縮
蟲蟄穴秋燈聽雨響騷屑誰爲西江縱巨鱗不使喁沫愁
涸轍試問古來老其名丸跳駒驟清魂驚蕭蕭駿骨幾人
買伯樂不逢空嘶鳴迤邐骨相賤子壽我躬不閱遑我後
長謠卻謝報故人磊落但澆燕市酒

夜來香

不竝朝酣國色看香生南樹晚庭寒薛家名類鍼因巧杜
婦情多枕亦安禪悅拈空宜月上逆風吹過擬梅檀黑甜

鄉裏憐花底功德惟參在鼻端

送鄒雨峯出宰襄城

西雍褒斜遠道經曲江宴後駕珠輶問程秋樹臨關塞得
句吟鞭指駟亭惠播香生花谷滿公閒山繞縣樓青他時
循吏稱三善羸取聲名達

帝庭

題董東山編修山水

生長江南山水州富春烟景卷中收愛他茆屋溪深處消
受高風送早秋

次韻葑林乞龍井茶

雙龍井路卜僧鄰穀雨精英揀別真一盞便回湖上味三

年遙繫武林春午鐺臥試聽初沸新水煎能有幾人

雨後積天

泉約葑林來試乾梅花

小閣瓶笙論舊事與君幽抱早相親

再次見謝餉茶韻

愛此新芽山水鄰好憑詩語道清真方珍鄉國雲巖品慳
與先生旅食春三索未嫌風掖客幾回思鬪苦吟人多君
公事如閒事只與烟絲一榻親

次韻次公壻讀首楞嚴經

文書遮眼絕交馳作饌烝沙殊自癡紙上拈來信手是門
前傳語到竿知一花五葉皆成果明鏡頑磚總問師妙諦
何須破萬卷語言空有便忘私

夜坐

重陽風雨後月暗淒客境獨聽雁聲新起辨微茫影

南歸畱別大兄卽次送歸原韻二首

匆匆歸計及秋時三載相依繫我思發興謀尊常索醉消
閒和韻日催詩客愁便藉驅千斛林樹難將借一枝觸撥
倚閭人望久棲烏靈物感名慈

無端邂逅逐槐黃歸路西風刺骨涼技到逢時生意氣射
能中的信文章卅年蹭蹬心如石一番羈愁鬢欲霜後夜
相思湖上月雁音雖杳總難忘

行至廣陵知北闈已放

年年岐路自東西一笑前山落日低較計欲歸歸便得從
今不管鷓鴣嘯

附南歸贈詩冊子并跋尾

賦得浙江潮

吳廷華

江頭歲歲秋濤翻四游升降排靈源大壘小壘勢欲揭
吳山越山如平吞先生盡吸入筆底學海一瀉幾萬里
濯得征衫去復還春風揮霍桃花水

賦得鷺嶺楓

符曾

沿堦初印霜華白靈隱寺前楓葉赤未從林外晚停車
先向江邊冷送客還家淨洗雙鬢愁攜壺小作溪山游
紅於閣上明寒樹醉眼西湖一角秋

賦得東園菊

杭世駿

橫河東去城頭路野老家臨清礪住年年愛種傳延年

曉起攜瓶汲疎雨三年燕市隔秋光幽媚無人自在香
笑待玉鳩浮綠蟻歸期應及展重陽

賦得東園菊用溫飛卿生禰屏風歌韻

馬位

梧葉飛殘暗金井薊門風起霜天冷此時忽憶東園遊
十畝秋容傲疎影蒲帆一幅烟濛濛且歸醉繞黃華叢
好治三徑應明詔來看上苑千林紅

賦得翁山桂

汪沆

小山叢桂枝相樛藤蘿窈窕丹溪流金粟如來夜說法
天香四出橫清秋故鄉已作三年別石洞無人積黃雪
君歸手把邳詵枝笑倚團圞深幌月

賦得竹閣

周天樞

湖光欲上孤山麓東坡老仙有遺躅想見披襟咏嘯時
蕩搖萬个瀟湘綠送君歸去乘秋風靈鷲香飄桂露濃
明月如珪人倚閣一聲長筵六橋中

賦得德生堂芙蓉

萬光泰

湖水秋高吹木葉水寒沙淺叢魚唼平洲四面小於城
載得紅霞萬千疊花裏石橋通宛轉舊游曾踏葺蒲短
歸時好放總宜船一鏡芙蓉月初滿

賦得月巖呈外舅南歸

姚立德

離筵憶得當秋半層巖皎月其中貫光華絕勝等閒時
人生聚散驚頻換蛛絲結硯徵瑞籙婆娑影裏看慈竹

尊前尚有未歸人苦說歸期歸未卜

戊午初冬谷林五兄自北歸相見于邗城同話
舊游有感因製角招一闕別後寄呈

厲鶚

話離索相逢又是江天雁影寥廓近來偏憶著竝馬去
程茆店山郭情懷最惡向舊日淮南棲託看盡人間迎
送似官道柳垂垂任西風梳掠 休莫琴移別調塵銷
古怨此意真如瘡夢歸烟漠漠題扇書裙三年前約吳
船乍泊早問取疎梅池閣爲怕寒香瘦削想翻笑我歸
遲延春酌

余惘惘出門仍惘惘而歸吁歸矣柳葉涼稀馬嘶晨

露西風日戒行色同時諸好宦游京師黯然各賦湖
山景物古詩四韻畢錄素冊實歸橐以相送正謂酒
篋將書麓誰言季孟閒可以歸已異日展此于竺鷺
水雲深處還惜不與諸君共讀林處士深居雜興云
諸葛孔明謝安石結廬南陽攜伎東山未嘗不以平
一宇內躋致生民爲念鄙夫則不然胸腹空洞無所
存置行樵坐釣外寄心於小律詩衡門情味則倒睨
二君而反有得色吾於此視諸君正復不知何如耶
戊午重九前三日谷林山人書

題內子病中梅花小照秋盡日歸家展圖手書

三年汗漫游歸數秋風淚相見一回老韶華等閒視嘻彼

圖中人對月詠鬢臂清容指點真此畫傳蕉萃憶昔抱沈
痾出門良匪易幽闥訊無恙音息天末寄亟求鮑姑艾愈
喜刀圭棄今我寂莫回子幸幽憂離梅花卷中披佳人雒
塵喟在楚萊子同有漢龐公企自此老滄江相守偕隱志

愛日堂吟藁卷七

